


長壽縣志

地志(5)
42133
部217



長壽縣志卷十五

文徵上

吾邑代有通人惜文獻無徵幽光不發先輩咳唾除明清兩朝專著存目外其餘作者間存詩文吉光片羽亟為流播勿令珠沈於淵見存人作品題未定遵例不錄惟有事實關係如遊覽山川景物敘述建置原委雜事附入者不在此例從升菴全蜀藝文志也志文徵上

專著存目

世德補拙集 明永樂舉人楊應春著久佚

孝弟文行已篇 明喻守先著

克己篇 明何朝宗著

袁氏立命篇功過格注 朝宗著

網菴集 明成化進士戴錦著

東山集 明昌泰著

天台山房集 明舉人李開先著

四書簡明講意

禮記勝金講章

周易辨疑

長壽縣志

卷十五 文徵上

讀吏評

臥遊錄

玉海新經

思齊錄

八股竅

廣韻考

盤餐錄

訓兒篇

詩文雜集 以上俱開先著

葵餘詩集 明崇禎舉人李開先弟瑞鶴著

易經啓義 楊紹曾著

五經文字

恆言家訓 俱雍正進士黃之玖著

五經注

北山文集 俱鄭明郁著

周禮輯要

樂意堂文稿 俱乾隆丙子舉人余光著

苾園集

賜書堂集 俱韓鼎晉著

軍餘紀詠 胡超著

襄垣縣志稿八卷 乾隆進士李廷芳著

封圻扼塞 李曾白著

沿江要害

七省海防

爾雅舊註考證 俱曾白著以上載府志

五種遺規淺說 張源深

慎思齋文稿四冊

書法存真二冊 俱向瀛著

尚友集 楊德坤著已刻

枳樂集 楊士瀛著已刻

周禮古學考十一卷 李滋然著

朱子集註古義箋六卷

羣經綱紀考十八卷

四庫全書書目考四卷

采薇僧詩集

明夷待訪錄糾繆一卷 俱滋然著

嘯聲樓詩草 任香涓著已刻

醫學入門 周本一著已刻

社會淺說

六一詩集 俱楊樹芬著久佚

長壽縣鄉土志三冊 彭光遠著未梓

漫游草三冊 彭光遠著未梓

修竹軒詩草 韓述敏著未梓

雄辨學 舉人呂策著已梓

槃阿集 劉君錫著未梓

易史通 傅維一著未梓

政治學概論 楊公達著

五權憲法與世界憲法之比較研究 孔慶宗著

長壽縣志

卷十五 文徵上

諭祭聶榮襄公文

惟卿賦性剛方持身廉介居官一品供事三朝晚節愈堅賢勞懋著敷歷中外五十餘年善始令終進退以正追維往績篤念舊臣哀計忽聞良用傷悼賜祭與葬以展恤恩神爽有知倘其歆服

按聶賢字承之明宏治庚戌進士由湖廣鍾祥縣知縣陞江西南安府再陞雲南洱海道官至兩京總憲曆任戶工刑三部尚書年八十

一致仕百官祖饒於蘆溝橋壽終九十諡榮襄崇祀鄉賢明嘉靖二十三年癸卯九月朔追封三代恩蔭一子贈少保兼太子太保遣四

川布政使左參議劉瑜致祭卽此文也

明嘉靖二十九年己酉三月望日追恩諭祭聶榮襄文

惟卿耆彥數曆有年投老林泉全歸窳窳追維往績宜荷卹恩爰遣有司遙賜以祭九原不昧倘其承之

定番州知州陳公殉難傳

諱新第字見恆陳公新甲之胞弟也崇禎末由明經授黔之定番州先是司馬公以曉暢武事熟習九邊地利情形爲懷宗所深眷曆薊遼陽和督撫而晉樞部公心豔之堦筵觀摩頗饒幹略思有以自奮及爲定番牧地與紅苗鄰苗善藥弩無虛發者公撫而用之會流寇破黔而定蕃距省會僅三日之程賊衆壓境或勸公急去曰吾有守土責城亡與亡爾或又言公卽弗去移孥寄箐谷勿令共困孤城中公曰軍民以數千百計夫獨非人情乎哉吾移孥則衆志弗堅吾誰與守比賊至公發技勇擊之殺數十騎初賊謂此彈丸地卽有深溝高壘直用靴尖踢倒不意勇銳若是乃遣小酋擁衆抵城下招降公僞許之伏兵擒酋而支解焉賊怒引兵圍城公據城固守被介胄晝夜巡邏凡雉堞糗糧與守禦之備皆素所繕完而藥弩爲第一應絃斃者不知凡幾相持四十餘

日力竭內潰城遂陷公被執罵不絕口竟膏賊刃矣予所聞於黔中人者如此嗚呼壯哉夫士君子幼習鉉誦長操筆翰不過工制舉業而已况君貴介據要津之勢則雍容紈綺亦其宜耳公居恆能留心韜略足見志尙而臨難致身絕無瞻顧忠矣予因之重有感焉運際鼎沸大廈非一木之支司馬公縱不以讒構死而敷天創痛吾知其績弗克成也况孤城無援其能濟乎昔馬謖言過其實而荆卿爲魯勾踐所叱惜其劍術之疎然則文士踐戎馬之場得勿猶有或疏者歟抑亦時爲之耶爰握管而爲之傳

王明選甘母蕭氏小傳

蕭於邑爲望族或曰鬱侯之遠裔也世系不可考也蕭再興之長女年十七適甘俸爵克執婦禮宗族鄉黨咸師其內範焉性端毅進立語默肅肅雍雍生子女各一子名起甲娶劉氏女幼年甫八齡值流寇猖獗

母攜家避難將渡江羣寇驟至縛起甲執劉氏及母幼女驚啼母攜之至張桓侯廟前廟固臨江高岸陡峻母呼媳若女曰可矣三人握手一躍遂葬魚腹中嗚呼烈哉是時予以舟爲宅方擊楫中流目擊其事不禁惋然謂閨閣中人率多柔懦巽怯又其甚者視節義爲輕全生爲重有此一念何所不至予居恆誦升菴詩至昔時不識門前路今日能彎馬上弓之句輒復泫然不意甘姓之母勇決如此今世所稱賢母者皆其子若孫或爲達官或爲髦士故能名榮青史然考其懿行未必盡愜人意至於臨難捐軀慷慨就義豈可多得乎貞烈至性長存天壤勿謂巾幗無其人也嗣後過草茅間見有夫婦相敬如賓者此皆節義人也必謹識之舟中搦管敬書其事聊當婦箴云爾

文可茹孫氏母子節烈傳

可茹涪州孝廉

長壽李公諱庚齊予年家兄弟也以庚辰特用御賜進士授秦之涇州

長壽縣志

卷十五 文徵上

四

太守在任娶婦孫氏髮燥就公侍巾櫛者十六年公嘗爲予言北人賦性貞介笑語不苟喜禮佛及讀節俠傳談亂離事輒拊心疾首曰婦有三從臨難捐軀此巾幗分內事公謂孫氏曰吾老矣慮世事反覆恐願不從心孫正色而對指天日以誓之無何避亂彭邑辟纒相從丙申有勅公還里者比歸而劫掠之禍恣矣械繫搜洗並焚其居孫奮刃爭死挽髮拉至舟中口嚙衣扣以給僕婦囑之曰汝逃去亟告君子吾卽以是物是日爲訣萬不至以苟生貽君子羞舟發銅鑼峽乘賊解繫給食抱十歲幼女黔姑投江死全舟驚愕轉述之予所聞於李公及舟子者如此公以母子之慘惋悼良深余因慰之曰孫雖泉壤節在千秋矣卽其早年志堅金石操凜冰霜豈獨於投江之日信其然哉彤管青史中當增一盛事九原有知應於江上作露筋祠耳又何悲哉請卽斯言以

累最廩

陳計長張氏節烈傳計長培陵孝廉

張氏者長邑庠生李翹曾之妻也會字羽堯兄弟六人長諱方曾字角月庚午舉於鄉一日家庭燕飲兄謂諸季曰吾兄弟讀聖賢書遵祖宗訓當以忠孝爲先不爾便官居卿相富敵陶猗不足齒也張於簾櫳內得聞此語夜語羽堯曰吾聞伯氏教君兄弟以忠孝可爲我詳述之否羽堯曰婦人女子烏用知之張曰君謂我爲婦人女子豈婦人女子遂無血性乎聞者怪之及甲申兵起長壽大亂羽堯挈妻子避於武隆縣行至蒲溪箐賊騎追來張知不免謂其夫曰君急逃避吾弓鞋蹻跚難以相隨從此訣矣此日此地是吾畢命之所勿以一婦人女子故陷君於鋒鏑同死無益也羽堯逡巡不忍去張乃以頭觸石血跡淋漓曰君去異日猶得瘞我不去共爲青燐鬼火誰復收此枯骸乎頃之賊至張已瀕死賊惡其偃臥大罵遂遇害嗟呼人生百年終一死耳使張不思

長壽縣志

卷十五文徵上

五

名義苟活賊營不過十年廿年亦與俱敗未免血污遊魂有愧君子豈得復祀於李氏忠孝之門乎予客寓武隆熟知其事思忠臣孝子義夫節婦有關風教張之節烈如此烏可使之湮沒不傳爰記之以風世云李開先冉母劉氏貞節傳

節婦劉氏邑人冉養鵬之妻也夫早逝年甫三十守節三十九年子棟材今爲庠生當父沒時尚在襁褓也明末寇亂歲饑流離困苦貧賤移人雖偉男子猶且難免况上無翁姑中鮮兄弟之孤孀乎劉每日吾不難一死以報地下其所以不死者以冉有諸孤在也百折不回親操井臼時若絕炊不以介意惟一經教子鄉閭稱之以爲兩間正氣而劉處之怡然直以爲婦道之分內事也昔彤管之賢或以節著或以孝傳或以貞名或以烈顯若劉者可以兼矣甄歌自矢矐光不改以節著也和熊訓孤克繼先人以孝著也甘荼苦以如齋節之貞者也曆百艱而不

變節之烈者也先民有言節孝之至其嗣必昌今厥子有聲膠庠觀其克養親志苦心下帷期以報劉光祚云耳異日出膺民社必能體貞母之庭訓以忠君吾將拭目俟之

華氏忠節合傳

華公諱成實字仲碩明舉人刺史耀公之長孫也其翁崇樸高才博學爲時名公子早折遺孤屬龔母育焉公幼負奇氣爲諸生時輒以忠孝自矢後客遊貴筑寓定番州遭張寇之亂城破遂不屈而死蓋順治丁亥年事也相夫子者楊氏卽今庠生諱福祝及壽祝之母聞變輒蓬首垢面以死自誓曰吾夫殉義吾應從地下遊但兩孤子在不忍令華氏如伯道耳日抱其子號泣不輟聞者悲之戊子己丑間會有姚黃之變人皆去鄉井楊蒙霜露茹草木以存兩孤於深巖大箐之中後復歸值歲大饑時有刃其子若婦以爲食者楊窘甚或謂之曰汝爲華氏亦已

長壽縣志

卷十五文徵上

六

至矣盍變其初毋徒作溝中瘠也楊毅然拒之益堅不可破曰吾寧饑困以死義不忍辱吾夫蓋崎嶇險阻百折不回而後撫兩孤以成今皆補博士弟子員文名藉甚爲邑冠冕且皆有令嗣以昌華氏之後矣昔嚴君平賣卜成都與臣言忠與子言孝而益州杜孟亦謂忠孝爲家之寶今夫以義死妻以節終雖古下壺甯多遜焉子不佞嘗有言人盡五倫理包四德聖賢千言萬語歸宿在此此事不明而覲顏人世亦行屍走肉耳且士君子網羅散帙博覽遺書讀古忠臣節婦傳不禁拍掌叫天聲淚雙下况生同時居同里目擊其事而忍令其湮沒不傳乎今仲碩公長郎福祝痛其先美之未傳也而爲軸以誌其顛末其詞哀其情摯其文表金石不朽固仁人孝子之用心也予老矣無所能惟於忠孝事每欲表章揚厲以俟異日之觀風者采焉庶知蜀雖天末尙有君平杜孟其人者是則余合傳之意也夫

胡母朱氏節孝傳

節婦朱氏者庠生胡勳臣蓋臣之母也幼適邑人胡文玉不幸文玉早逝朱方二十有八歲子幼家貧紡績爲業里人聞其賢爭欲委禽焉朱矢歌黃鵠義不更入二庭居亡何蜀中大亂人皆遷徙圖存朱攜幼子避之貴筑于時顛沛流離矢志益厲不幸而翁姑繼亡朱借貸親知殯殮如禮人皆躐之且生母乏嗣他鄉無告甘旨之奉皆朱勉供卒之日一如翁姑送終之禮嗟乎疾風勁草板蕩忠臣不謂巾幗之流反出於鬚眉男子之上君子所以讀瑤池古雪之章而潸然涕下也今教子旣成名有聲庠序而一家之中節烈孝友同居共爨毫無間言夫和氣致祥因心篤慶吾知紫荆樹下丹桂堂前朱不獨爲趙伯高妻且爲鄭善果母矣異日聖朝旌淑表幽垂芳彤管采風者非忠節之孝其誰與予不佞敢豫券之謹序

長壽縣志

卷十五 文徵上

七

何其微李處士傳

處士姓李諱開先字傳一長邑龍市里人也遠祖文質公自楚麻城遷蜀因家焉曾祖諱秀春嘉靖時官待御史祖明經諱之應父諱士震字岷來萬曆乙酉舉人官刺史母華孺人生五子皆以科第顯處士行四幼美丰姿總角時邑大司馬陳公見而異之年十四隨父之麻陽任所就童子試獲售學使尹公深器之移回本庠諸邑侯皆許以國士而程公度尤破格賞識謂爲人中龍己卯與弟瑞鶴公同舉於鄉庚辰試南宮未捷癸未計偕至陪京時國事已去處士遂迂道歸因過姑蘇涉錢塘訪先哲之遺蹤身所經歷輒記以詩甲申後隱居彭水之羅村日以詩酒自娛著有羅村歲時記自是不復言仕矣先是有貴顯正室新寡美而富處士時正鰥居衆皆勸以委禽處士笑曰向子平有言富不如貧貴不如賤此正儉德避難之時豈可財色動乎庚寅春聞父崑來公

隨長君喬宿任中遇賊不屈死遂棄家往尋布書千里尋親四字背負之使關隘勿阻及至遵義孫秦兵出道路皆不通矣處士竟抱終天之痛命子孫曰吾沒後以麻衣加吾身不得用帛吾歸九泉目卽瞑也已亥春清四川制撫李國英聞處士名檄令郁山總戎秦篤名安車護送至渝相見處士以先人廬墓在長不容不歸遂著黃冠鶴氅揮塵以行既歸長李公復以手札相邀逡巡五月始往謁信宿卽不辭而歸李公知不屈贈額旌閭不復邀矣方其隱居羅村時孫可望猝以大昌道相招處士力却之隱居數十年怡然自得少入城市邑宰屢邀之辭不赴胞兄二峽公常稱處士爲有道君子丁未壽六十二峽公爲製祝詞述處士行誼甚詳處士善讀性理諸書手不釋卷五經外如天文地理奇門卜算皆涉獵焉著有四書簡明講意禮記勝金講章讀易辨疑讀史評臥遊錄玉海新編思齊錄入股竅訓兒編廣韻考盤餐錄詩文雜集

長壽縣志

卷十五 文徵上

八

等書嘗自言病中大有得力處雖旬日不食而神氣如故尙能作文書字如無病時然亦不自知其何以如此也其居家喜怒不形家人竟日不聞其聲蓋性之所秉而亦學問之力也卒年九十三歲

王奔清忠節錄序

奔清四川學使

忠節錄者蜀義士華君與其德配楊氏殉難守節之略也義士爲長邑諸生流寓定番遭流寇亂與其友人乘城固守被執不屈赴水以死配楊氏苦節四十年撫子若女咸底成立華氏宗祀得以不墜當時人或_有以榮枯盛衰之說動之者而楊氏不顧也嗚呼忠義節烈之行登_仕者不能爲而布衣韋帶之士毅然爲之盤根錯節之操負鬚眉者不_克任而閨幃巾幗之儔起而任之嗚呼其行事豈不偉哉然而死事之家不並有懷清之築也高行之門不盡出全節之侶也今義士之忠光於日月夫人之節凜於冰霜天地正氣萃于一門不尤偉哉義士子福

祝作風木紀以誌其痛而諸孫孝廉灝等又爲遍乞諸名人題誌以代表章唐甄逢常以其父名不得在國史屬元槓移書史館修撰韓愈爲述其事曰甄生布衣一男子耳及亂延頸受刃分死不回在古與今蓋百一焉義士之事略與甄類今亦未登於國史而推其子若孫之志其猶甄逢之義也夫孝廉固予之視蜀學時所識士也因其請爲之序如此

嚴虞惇風木紀序

記曰謀人之軍師敗則死之謀人之邦邑危則亡之此千古之大戒也華公之死于定番身爲布衣不食君祿義可以無死羈旅他鄉職非守土義可以無死而公必于死者處圍城之中與守城之役捍拒三月親經百戰力屈被執罵賊而死此亦敗則死之危則亡之之義也嗚呼當夫天傾地陷颺回霧塞之秋之垂紳正笏建旄樹節者吾見有篋厥玄

長壽縣志

卷十五 文徵上

九

黃奉表稱臣者矣吾見前徒倒戈賣主求媚者矣吾見有鳥奔獸竄委而去之者矣公以藐然書生偕友殉難南人義不忍食臧洪誓不獨生固其忠使然而三百年前尊賢養士之報于公亦概見矣公夫人楊氏百死一牛撫孤守節此在常人以爲僅事而夫人則有所無難者天下有忠臣義士之妻而改節易行者哉有是夫有是婦兩賢相遇一門不朽天之所以玉成之者固甚奇而亦甚恆也康熙辛卯予探風至蜀公之孫灝爲予所得士出風木紀請予爲之序予于公見忠臣之至於楊見節婦之至風木紀見孝子之至故樂爲書之如此

王長德西甯風土記

蘭州出長城渡黃河七百餘里爲西甯蓋古湟中地也其形勝則南山聳峙中頗平衍溪自南遶北匯衆流而東以小峽口爲關鑰雖邊塞彈丸而五土之人與番回西戎咸貿遷於此亦一都會也有城有郭錯

處於郭中而別爲閭者有回回城文武之秩凡十有三自尊而卑其數凡五十又二有元戎佩方篆有憲副有中左右前後營有城守營將弁如營制有別駕有衛守備有經歷司有驛有丞有茶馬司權商茶以儲互市者也考天時則播種以四五月刈穫以八九月氣寒而冰堅也稽地利則無田水冷而土瘠也人之殊類者凡七自土農工商而外形貌有甚相遠而服飾異言語異者有土人有番有番僧有回回有西韃靼有纏頭有假兀子資服御之用者凡五有羔羊之皮有氈纓有牛羊羝有褐衫物之產凡卅二有麥有青顆麥有黍有豌豆胡豆牧畜有釐牛有扁牛犍牛然釐牛不任耕不任乘載僅毛可爲纓肉可食噉而已有綿羊有大尾羊獵於山者有黃羊有兔兔名以色列白者最良又最蕃息湟中人多畜之禽有紅喙鴉有雉有鴿果有棗有杏有柿有花紅有石榴有胡麻有延壽果俗呼蕨麻蔬有髮菜五六月生山中細如髦亦

如之有磨菰有白芥黃白蘿蔔菠菜韭葱胡萎與他土同其販自遠方而售於市者玩好之物曰珊瑚曰黃金曰石青曰瑪瑙畜牧曰駱駝曰馬食品曰青鹽曰黃鼠曰蘋婆果曰綠葡萄曰瑣瑣葡萄曰白葡萄曰西瓜曰胡桃曰梨衣裳之材曰西貂曰玄豹曰銀鼠曰捨狸獬曰沙狐曰灰鼠曰狼曰姑羝而布帛罽鳥麻縷絲絮與水陸之味同於他郡邑者不贅錄焉其一物而分製之遂異其名者狐爲多天馬皮爲上烏雲豹次之金邊又次之灑金扇又次之麻葉子又次之其商貨奉公絡繹載塗者茶爲多然不堪烹啜以市番夷之馬其負重致遠者牛車爲多驢次之騾又次之其晨夕轉輸者芻爲多薪炭煤次之米麥又次之棟宇棺槨諸材木又次之其番夷所崇信凡四境內外皆建精藍者僧爲多達賴喇嘛爲尊國師次之藍占巴又次之夾住又次之夾不住又次之番漢互有稱貸漢人善逋負久而不償則掠牲畜甚且殺人名曰取

當官司不能詰責乃令譯者隨弁吏或役卒詣所在寺僧期會質詢有匿情實者則抓斧撈油始議罰服其例以馬牛羊弓矢布麥等物各一其數至九輕則二九重則九九而止取兩情輸服結狀存案有經一二年始結者漢夷貧則親父兄鬻其子女與弟別時父兄無淚子女與弟無愁恬不爲怪湟中之地有以所無爲苦爲無梗無朮無菽其值甚昂山無花木無竹食無嘉魚無筍無薑無時蔬飲無茗無旨酒有以所無爲快事者無虎豹蛇無蜈蚣無蚊無蝎無蒼蠅無鼠無蟻盛夏及三伏皆清涼無暑故不揮扇不服紗紵絺綌不臥筦簟

外史鹿田氏曰湟氣寒土瘠民貧且惰男子壯卽入伍爲健兒不則逐末業走番夷如鶩女子跌足冶容不習織紡針紉予察其風俗性情不厭譎夫人而能爲譎也不競武健夫人而能爲武健也不醜番夷夫人而能爲番夷也然城郭數萬家穀擊肩摩亦極蕃庶矣熙攘來往皆榮利耳富者翩翩裘馬呼盧買妓貧者盍無升斗之儲臥無衾褥至所鬻子女且無衣無袴若乃薪芻不易得比戶晒馬糞燒土坑以永今夕則貧富一也所由與中土異哉

余文燿雷公生祠碑記

崇禎癸酉之歲旱魃爲虐自春徂夏芽甲不暢幾失有秋之望人情洶洶二尹雷君不啻若已饑也築壇齋宿與縣父老子弟奔走於紅塵赤日中兩詣清淵老龍諸洞號天籲地爪髮不愛似必欲以身爲民代者精誠所格陰雲四塞大雨如注水沒龜坼勾芒起蟄歲因以登四野愁氣俱破而公之眉宇始舒也捐俸建祠祀五雷以答神貺父老子弟亦咸公明德而肖像祀之祠成而問予以記予爲陰陽二氣結而成雷部析五屬宰御三界而五星分掌之天雷屬箕故有天烏天鎮天洞天眞之神地雷屬房故有雷主闕伯火伯風霆之神水雷屬奎故有木狼洞

陽金精浩師之神神雷屬鬼故有歛火律令邵陽狼牙之神妖雷屬婁故有丁幸洞晉喝婁伽夜之神所以發道用彰天威而陰陽二氣得其施設也昔白玉蟾爲典雷仙吏故能居玉池滴金瓶兩騎風輪惟所駕御而成雲行雨施之功以序品物雷君承耳卽峨松詠菊能不負承然天人之際亦何以捷於感召至是豈亦仙而吏吏而隱者耶邑之西郊有巨石相傳雷劈苔蘚封處石髮可梳蓋不知幾百年所公至而劈以爲橋子來鞭驅層崎嶇如平地從來未竟之功成於不日始知爲公先識此已異矣茲又心焦雲漢手挽天河沛甘雨而穀士女若不讓玉蟾專美於前者公之清風惠政不可更僕數而卽靈雨靈橋有異焉者以此祠之亦足千古矣然是祠面襟桃溪之水背枕金龍之山左則定慧菩提風送曉鐘右則桃源洞天樹飛紅雨且在縣治之東其卦爲震震爲雷於時爲春可以像公之春生也香火此地其卦爲豫爲豐祈晴禱

兩禳災捍患於是焉在豐亨豫大之象公實貽之後之人祝於斯養于斯含哺鼓腹于斯睹廟貌而思舊德召棠耶徠柏耶硯山之碑嘗嗟峨于人口矣此父老意中事也因述其意以爲之記公姓雷諱文號鳴車由尙書曹掾出爲丞江西德化縣人

請速靖水藺疏

見四川總志

題爲水藺渠魁就戮西南定局已成宜慎剿洗之路以速安攘之效事臣乞身歸省踟伏田間者四年餘日聞彥賊負隅狂逞而逋寇奢崇明爪牙之先事者苦于虎穴難探每謂餉不足兵不多曠日綿歲老師費財民膏日竭而賊焰日張岌岌乎莫知所終矣幸督撫按臣新授方略道臣劉可訓鎮臣侯良柱以一旅之師破賊十餘萬衆直如拉朽摧枯豈專師武臣之力仰賴皇上威德遐邇莫不震疊故兩臣身先士卒背水決戰直以忠義之氣勝之耳元兇大憝殺戮幾盡倘寬脅從之誅西

南半壁已悉從而底定矣廟謨宏遠將欲剿洗以盡殲之拓土開疆此最勝之烈也惟是駭鹿易逐狡兔多窟土夷烏合而實繁有徒嘗見貴州解圍之後賊無堅壘直搗大方當時倘加持重豈至自棄前功懲前愆後必須先事詳計謀出萬全以畢此不常有之奇勳所當慎者一也功名之地人所欲居軍氣方揚易於輕敵而功高取忌則挑釁養寇逗遛以自圖者又未必無之嘗見三路進兵期會牽制勦撫異見庚癸爭呼幾同聚訟若非賊寇門庭道鎮獨當一面誰爲出奇制勝故必協力同心呼吸相應將伯必可助予因人不防成事前矛後勁殺賊招降總屬廓清勿致見分爾我築舍道旁失此不再得之機會所當慎者二也水外膏腴已無難收入版籍進爲深林密菁陵谷險阻攻取難爲城守不易嘗見遵義郡縣其地者近三十年則壤所賦幾何有無補於公家而城郭宮室官僚守衛之費先已不貲安在廣地之不荒而遠略之足

勤也鬼方僻壤力爭諸原得江安用當先有控馭成畫以厝置之勿徒疲腹裏以事荒服而竟委此血戰之功於草莽所當慎者三也西南用兵九年兵戈所駐荆棘生焉諸所經過室廬荒廢萬竈寒烟蕭條滿目今幸大捷正哀鴻集澤之日矣兵貴拙速不尙巧遲速則乘機巧則生變况亡酋傷夷之餘躡以大軍有何堅陣卽當尅期蕩平甦此轉輸之遺子勿使遺孽復安又生多事倘或尙須斟酌亦當早爲請命罪在可原者待以不死使知雷霆自擊天地自寬戰勝之師寧戢而不騁以安反側之勁敵功在攻克後之窮寇功又在收服勿但貪功妄殺零報捷致時可削平仍賣劍買犢之無期窮兵黷武自焚可虞干羽兩階豈曰虛語庶楚蜀滇黔每歲百萬之金錢不至長付之逝波也慎以相機速以結局安危難易略刻是爭審時度勢西南安攘之急着似不出此

韓鼎晉奏陳四川應除積弊六條疏

一禁科派以安閭閻川省山川險阻從前勦辦兩金川兩藏留疆時挽運芻糧不得不稍資民力所以各衝途州縣設立軍需局民間奉公樂輸從無怨讟迨勦辦教匪時政爲津貼民力雖疲亦爭趨恐後幸而邊隅靜謐地方官吏自當愛惜民力以休養生息爲務乃科派津貼之事竟成積弊牢不可破查近來衝途州縣每年仍按糧科派易名曰夫馬價以爲供應大員往來差使雜費其實本官衙門一切費用均出於此每丁銀一兩或派制錢八百文一二千文不等一年數次設局徵收恬不爲怪亦有人民上控該管上司不過曲爲調停總不能力除其弊近聞又有按糧派銀置買田地以供夫馬之役者無非累民之事伏思近年屢奉諭旨欽差大員騷擾驛站尙嚴加懲創何況本省大員自更不敢擾累地方州縣等何得籍此名色供其貪婪臣愚以爲川省經教匪蹂躪之後仰蒙皇上覆載天恩數載以來雨暘時若年穀豐稔地方官

正宜加護息培補元氣護息之道惟在督藩大員等嚴禁科派永不許有夫馬名目及派民置田供應之事俾百姓家有餘財人有餘利則仁讓生於富足矣一除囑匪以防積漸查川省自邪教蕩平以來民慶屢豐元氣漸復惟近來囑匪潛滋川北川東爲甚自五六十人至一二百人不等或聚或散忽東忽西遇行客則肆行劫奪入場鎮則結黨成羣而大江船隻劫掠更多各州縣等皆因該管上司以地方平靜後不欲辦此種重案遂多不稟報亦不肯實力查拏卽有鄉民告發亦不過派撥差役虛張聲勢驅逐出境而已間有案情重大贓銀太多及傷斃事主者不敢不稟亦祇化大爲小顛預了事十二年五月內臣目擊本籍長壽縣會匪滋擾一案皆由囑匪迫脅良民所致深染未除乘機易發與其姑息養奸釀成巨案何若先幾籌辦力斷根株此外鹽梟亦囑匪之漸聞上年冬間重慶府理民廳有鹽梟聚衆抗官一案多至千餘人

雖當經解散亦未能澈底根究尤恐釀成事端合應仰懇聖恩敕下該督等嚴飭所屬文武實心實力查拏淨盡務使各知警惕不至視爲具文庶可戢盜風而安良善一查卡房專爲拘禁雜案而設原屬違例聞卡房內有實係盜賊者有因賊扳誣候質者有因賭博鬥毆待質者亦有良民因尋常詞訟案件未遂本官之欲而觸本官之怒遂任意拘押者卡房內屋祇一二間極其卑陋動積至數十人每至溽暑嚴寒時病斃多人亦多不稟報故百姓定多畏卡房百倍於監獄臣嘗日擊其慘總由地方官不以公事爲重於一切雜案不肯趕緊辦理且於應禁應保者毫無區別以致不應死之人殞身囹圄誠堪矜憫臣思刑部監禁每月遵旨派御史二員稽查一次仰見我皇上重庶獄至意至外省難結之案甚少何其草菅人命至此無如積弊已久難以驟除惟有仰懇天恩通飭四川及各直省地方請照刑部稽察之例於每年夏冬間令

該管道府輕騎減從各分查一次除真正盜賊仍行拘禁外當審釋者立行審釋當質訊者立即判決使小民無辜之告可以稍免庶足以全民命而廣皇仁一禁拐騙以儆貪頑嘉慶六七年間川省匪徒乘邪教甫定之後擄掠婦女運至湖北一帶販賣仰蒙聖恩飭查經督臣勒保實力嚴緝閭閻始安乃近來販賣婦女之弊日起瀘州合州重慶等處各有總販窩家數十戶如重慶著名窩戶則有蔣雞公葉大脚劉四海等平日同夥多人分往各州縣地方或暗拐良家女或託娶買妾買婢名目誘騙窮民陸續送交窩戶每一起約聚至數十人卽雇船由大江直下凡府州縣巡河差役每婦女一口索錢一二千文卽爲照應出境至夔府關隘緊要每婦女一口差役索錢四五千文亦及放過一到湖北漢口地方又有包攬窩戶代爲發賣陷入污賤者十之六七強作婢妾者十之二三無不吞聲忍恨含冤莫白計一年內由川販賣至楚者

絡繹不絕臣查此等積弊先由地方官於拐騙之案並未實力嚴查而巡河差役又得賄縱放該官亦置若罔聞至夔關爲楚蜀咽喉復不能禁絕差役賄縱該犯等遂至肆行無忌惟有仰乞天恩敕下督臣等嚴飭各地方密查嚴辦於瀘合重慶等處總販窩家尤當嚴拿淨盡至夔府關口所繫更重必須地方官實力嚴查重懲差役勿許放縱庶拐騙之弊可除而良民得安矣一嚴攤捐以養廉潔我國家命官詔祿厚其俸以養其廉恩至渥也乃川省官場攤捐陋習久成風氣竟有駐省辦事之人及督藩臬大幕藉生辰爲名由首府首縣代出知單斂湊公分每次分金十餘兩至三四十兩不等一年之內此等知單或五六次十餘次不等至科場派捐公費一節更爲浮濫蓋州縣往往不願入簾每科派調同考官時其已經擬調不願入充者則自捐銀兩名爲科場公費央首府首縣代懇免調其未經擬調者則首府首縣居然函札四出

長壽縣志

卷十五 文徵上

一六

徵求公費該州縣思欲拗違則恐其改單補調不得不如數送繳上缺州縣以五六百兩爲率甚有至千金者中缺二三百兩不等臣查科場經費例得開銷國帑者原甚充裕且川省科場陋規又與京闈及他省迥異每科場年分二三月間兩首縣硃票四出各行當差官價已減民價數倍其實又多不給價竊思既有照例開銷之項又一切取之民間辦理科場何事不裕其派斂各州縣之捐幫公費徒爲首府首縣等浮濫支銷並藉飽私橐聞各直省亦大略相同似此浮濫攤捐各州縣等廉俸已屬全虛卽廉潔之員亦無力辦公一遇貪墨之吏其勢不至侵虧國帑剝削民膏不止應請敕下督撫等嚴行查禁實力釐剔俾服官者得領實俸庶可廉慎辦公一核戎政以歸實效兵可百年不用不可一日不備皇上每屆大閱之期特命直省大臣閱兵一次惟以訓練爲務典致重例至嚴也臣竊聞近京各省軍政尙修遠省每視爲具文卽

如川省曆來兵額缺多虛懸上下通同侵蝕兵餉每遇大員閱兵及從前有事勦捕時多臨時召募率皆市井無賴窮民略爲演習以充近聞各遠省亦多此弊致武官以嫻習弓馬爲要豈可好逸惡勞乃川省參遊都守等官竟多乘坐四人大轎日事繁華用費奢侈正不知從何項得來抑臣更有請者從前邪匪滋擾陣亡之弁兵等恩予賞卹銀兩所以矜其節而卹其後行伍無不感荷聖恩使該管將弁稍具天良必當詳查給領以贍其身後乃川省弁兵陣亡子孫半多零落領取賞恤時多方刁難得領者十無一二致陣亡之子孫現多流離困苦下同乞丐該管將弁等假名存作營中公項其實任意花銷已盡虧缺嘉慶十四年署重慶鎮總兵官桂涵曾參辦虧缺一案聞卽係此項銀兩雖已辦結尙多不實不盡仰懇天恩嚴飭該督等實力嚴查如有陣亡子孫未領賞恤銀兩者卽令該管將弁會同同城道府等官訪查確實當堂給

領不許稍有刁難如實無其人亦當詳明督撫將賞銀繳還藩庫庶不至虛糜國帑臣聞此弊陝楚略同應請一併飭查再各州縣例有分汛駐防武弁皆千把外委等官原祇彈壓地方不許干與民事乃川省近年居然分汛缺之繁簡鑽營而來一經到任卽干與地方公事除刑錢重案外其餘出土門毆債帳一切雜案擅受呈辭票差兵丁鎖拿人民掌責杖責全同有司其判斷曲直惟以賄賂之多寡輕重爲主地方官多被其挾制隱忍不言應請敕下督撫提鎮大員嚴行申禁實力查參庶使積弊漸返而戎政亦肅矣以上六條悉蒙俞允飭禁

汪敍疇奏陳鞏固海防以禦倭寇疏

爲海防緊急臺省逼近倭寇因條陳管見并自願投效臺省仰祈聖鑒事竊臺灣一省沃野千里物產豐腴孤懸海外逼近日本久爲倭寇所垂涎東南方之大利大害皆繫此一隅今倭與中國交兵臺省海防視

他省尤爲緊要臣不揣愚魯謹擬管見八條以備採擇一將帥宜虛心也今所撥將帥皆久臨行陣非不知兵者比然宋岳飛將戰必聚集諸將謀定而後戰乃能所向有功况倭寇久習洋操尤非土匪可比凡一切安營壘固礮臺治舟楫修器械習陣法守險要擬請飭下各路總帥徧訪偏裨使各獻所長以資決擇不可恃勇浪戰致誤事機蓋今之戰法異於古人必使師古而不泥於古宜今而更不泥今惟虛心籌度乃能師出萬全一士卒宜預練也今綠營既不足恃有事則招募營勇然皆剃髮逆殲擒毘之故智未嘗禦海寇也今禦倭寇不能不招募而簡閱訓練與昔年大不相同亦非專恃洋操所能制勝擬請飭下各營將帥認真精練破除積習使胸有把握則取於平時乃能奏功於臨事况練成勁旅先聲奪人不戰而賊膽落矣焉敢妄行窺伺乎一謀勇宜兼資也古人軍中必有謀士今所撥提鎮而外惟有辦文案之人是有韓

彭而無良平也况今日競用槍礮我能敵賊亦能傷我但欲傷人而不計人之傷我非善謀也竊思禦備槍礮宜變通古法或以月剷或以箕蓋或以幔以籠或以牌以洞或以土壘地平昔必躬親試驗始能力挫凶鋒蓋礮火至剛而不能克柔也大抵禦洋槍與禦抬礮殊與禦開花礮又殊陸戰與海戰更殊有鐵甲船而無以固其鐵甲雖厚鐵亦易摧有陣勢而不善用其陣勢雖嚴陣亦將散有馬隊而不善藏其馬隊雖良馬亦易驚必也如伏虎如疾鷹如撒星如驟雨排如八卦變如五花坐如畫井起如湧潮運之如銅盤撼之如鐵壁強而誘之以弱正而濟之以奇縱橫變化而不亂神出鬼沒而莫測攻之而出其不意截之而使不得歸追奔而不陷於伏既勝而不涉於驕退縮必嚴以刑班賞不私於己意見各據羣策斯運用妙於一心使非周諮謀士焉能臨陣出奇今人材不乏或欲効而無由擬請明降諭旨招賢納士飭下督撫

搜羅使之運籌帷握必有伏龍鳳雛應運而起庶英材聚會而外患可無虞矣一會匪宜解散也今哥老會隨地皆有而燈花教在禮教亦多各省皆嚴拿匪首而匪首實不易拿皆使其匪徒出以搪塞耳若使海氛不靖會匪或乘機而起兵餉時虞不結請飭下督撫特寬禁網無論其是匪與否其有謀有勇者皆准其投效軍營予以自新但擇其豪傑而用之豪傑業已搜羅其匪徒之無能者不足患則內患消矣各營皆有材勇其無能者淘汰之則兵精而外患不難平矣一地方官宜知兵也沿海各省地方官有知兵者有不知兵者今倭船飄忽尤恐擾害地方擬請飭下督撫凡沿海地方擇其廉能而知兵者使辦海防其不知兵者與腹地官對調凡辦團練修城池治器械責成地方官能禦寇則予以懋賞而官軍又隨時策應守既固而倭船之往來搖駭不足懼矣一高麗宜善處置也聞倭寇將高麗國君擄去國中無主急宜簡立前

王親族而派員幫辦八道軍餉等事以壯我軍之聲勢掃除前日苛政輕徭薄賦以悅民心助以兵而不取其地以免他國分割全高麗卽以全我羽翼中國可高枕無患矣若使他人分割必貽後日腹背之憂一奇兵急宜講也倭寇聚高麗而日本四方臨海國中空虛必難處處防守擬請飭派閩廣二軍訪問老舵師以爲嚮導由海中間道一軍先發一軍從後接應直入日本國都俘其僞主簡策鄉民理事仿照合衆國例亦無使他國分割藉爲中國屏藩則日本亦爲我羽翼也日本平定其現在高麗之倭寇不戰自降矣二國皆不取其地者蓋我取之他國必分割之置數強國於肘腋間勢更危迫不取則可免他國之覬覦且取之則添兵防守費餉必多不取則二國雖瘠苦無煩中國之兵餉也一台省海防不可忽也台省平田彌望一年三收出樟腦可造火藥基隆出金若使倭寇得之有穀有金有火藥屯匪十數萬東南不安枕矣

臣昔時在籍遭李逆藍逆之亂曾帶團練及捧檄滇南又值杜逆竊踞
臣開考鶴慶臨安皆往來賊壘之間而無所畏今年歲雖增志力尙壯
其禦備槍砲之法採訪蓋數十年矣今倭匪近接台灣其海防視他省
尤爲緊要臣熟觀台省形勢因思國厚恩不敢自安閑散冀報涓埃可
否發交台省撫臣差遣委用出自逾格鴻慈謹奏
胡超軍餘紀詠自序

毛詩序云詩以言志又曰賦者敷陳其事而直言之也予以武略起家
久疎筆硯憶自髫齡就傅及應童子試時及就吟咏因早失怙恃未能
卒業乾隆五十九年苗疆蠢動投筆從戎秦川楚壁曉夜犇馳蜀水黔
山東西靡定後以擒捕微勞授職巫山癸未年間始得稍暇乃復遭讒
謫投效涓城從征楚豫南山叛匪改官秦中暨口外之徵仰荷皇威不
振獲其大酋獻俘闕下青雲忝附圖繪紫光闕今已年逾六秩矣通計

長壽縣志

卷十五 文徵上

一一〇

生平環甲日多讀書日少戎馬風塵中豈復能揣摩比興學步騷壇不
過身之所曆事有可紀者於深宵嚴備時借毛錐爲警枕以誌一時之
實猿臨風嘯鼉應更鳴豈云有當歲辛酉奉敕防堵天津海寇同寅諸
君子偶見舊稿慙息付梓爰爲縷陳顛末尙希詞翰名流辱加斧藻俾
不至貽誚粗陋則幸甚矣

霍潤生嘯聲樓詩序

潤生邑令泊水人

世有隱君子類皆匿采韜光不求名於世卽託爲詩歌以見志亦隨所
感觸抒寫性靈而非必斬人之稱頌而傳述之也而一時之聞其人讀
其詩者往往咨嗟太息若較出諸名公巨卿之手倍足珍重吉光片羽
必欲傳後世而垂不朽豈非闡幽之意好善之誠固有發於至性而不
能自己者歟吾澤有張雋三先生者晉隱君子也少工詩補學官子員
輟棄去遜大梁聞越吳楚燕齊間而其詩益進旣倦遊歸臥析城王屋

山下日與其徒徜徉詩酒絕無抑塞牢騷之語形諸詠歌其澹於名也如此嘉慶辛酉周石芳學使按試澤郡物色得之爲刻其續尤西堂明史樂府百首而所著豔雪堂集藉以並傳予亦澤人慕雋三先生之爲人時吟咏其詩以自遣光緒戊寅由工部改選得蜀樂溫下車觀風頗多能詩者簿書少暇都人士未及一一延訪之一日王誥卿尹手一編來乃香湄任廣文先生詩桃燈疾讀大抵工於言情長於論古不屑屑規撫名作而其雋爽超軼直欲突過古人爲題五律二章以誌欣慕他日來謁倒屣迎之詢其生平與雋三先生絕相似與議論上下今古意氣和平神志蕭散全無名士虛僑習其亦澹於名而深於詩也宜哉鄧伯垣成才其門人也欲付諸棗梨而爲之請序於予予喟然曰名之有幸有不幸也如是夫士之有高才而又有貴仕者財足以取名有高才矣或得一在位有勢力者爲之大聲延譽則亦足以爭名於世國朝蜀

長壽縣志

卷十五 文徵上

一一

詩人如呂東川老人費此度皆特出者東川老人詩忠孝之忱溢於言表無竹垞之評亦足以名于時此度爲漁洋所激賞而名滿天下今取費詩讀之如孤艇殘春句殊不多得非登高而呼之謂耶之二者香湄皆無之而又不屑與一時稱詩者標榜壇坫間落拓半生頭童齒豁而不出里閭視雋三先生之見知於石芳學試又不逮矣可慨也夫予不工爲詩予言曷足爲香湄重然闡幽之意好善之誠實有發于至性而不自己者詩雖二百餘首較名公巨卿之作倍足珍重也抑雋三先生之於香湄譬諸臭味之無差池他日聞其人讀其詩其咨嗟太息當何如也

陶斯咏項氏修譜序

嘗思合族敬宗譜之所以作也支分派別譜之所以修也莫爲之前雖美弗彰莫承于後雖善弗傳查宗譜之源始于漢唐命公卿大夫賢士

碩彥及天下大姓編爲系譜所以教天下之孝也孔聖溯源必始夫殷數典忘祖春秋垂戒蓋本支難沒遠近堪稽良有以矣後世姓氏日繁因功而受賜或附會而自誣又無足徵也若項氏之得姓也原於周姬成於汝水累朝瓜瓞之綿益斯之慶世有哲人迄明初代由楚遷蜀我邑西徧世稱望族第年湮恐其瀆亂項公子宜于今年春創敘譜牒誠篤本根明倫紀敦愛敬序昭穆存宗親之盛舉典至重也情何歉乎至誇簪纓之盛科甲之延有陳迹可考焉茲不復序

周澤溥藤蔭軒詩草序

稽麟閣之元勳時鍾賢哲溯鳳樓之造就多屬曹司問誰俎豆夫少陵共述淵源于博陸如我邑侯霍雨霖司馬本太原望族具翰苑清才通籍之初觀政水部分符以出來宰山城陳午亭藤蔭樓遲舊夢尙縈風月宋牧仲花間唱和深情愧判仙凡此詩集之所以名亦宦跡之所由

長壽縣志

卷十五 文徵上

一一一

紀也詩託始於部銓之歲以迄於俸滿之時少作悔存焚如莫覲結習難忘興至輒詠凡山川之所經耳目之所及家室友朋之聚散忠孝節烈之昭垂風化攸關勸懲斯寓非徒追摩作者取悅時人積久愈多殊難割愛私釐訂免致散亡當其捧檄出都覓舟歸里值荒年饑饉建白無人承寵命褒崇焚黃告墓補元相悼士之什繪鄭監流民之圖惘惘出門遲遲行道經郭汾陽之故里緬楊太尉之清風想開華嶽之雲誠通上帝倦聽長安之雨喜遇故人靡不夏玉鏗金鋪芬挾藻流連光景抒寫性靈既而渡渭水過咸陽瞻鳳嶺之發祥感馬嵬之致變識嶓山之導漾源別沱潛走棧道之連雲神馳巴蜀藉得以謁留侯之紫柏甲孟起之沔陽低徊於落鳳之坡沉吟於臥龍之陣又莫不景仰深之感慨係焉及其銅章握手案牘勞形撫字未遑吟哦無暇龐士元才非百里展驥未能陽道州任已十年飛鳧莫遂夫何興復不淺學乃兼優不

鄙官卑惟求民瘼實心實政時流露於五七言之間愛士愛人咸搜羅
在二三子之列懷四知而勵志果三善之稱能卓薦特膺不負一杯飲
水樸誠報最欣邀九陞書屏然後知風塵中無貪鄙儒雅管內有神仙
令也尤難及者循良馳譽清白不渝未矜聽訟之才雀角之爭自息祇
續絃歌之譜牛刀之刃常新弊絕風清拔真才于士類禮明樂具復古
制於賓興蓋其懇摯之忱積於中者久故諷咏所及流於外者真也或
謂司馬以醇樸淵雅之才際颺拜賡歌之盛使得簪毫待從必能鼓吹
休明而乃落拓一官沈浮下邑雖優經濟未盡設施循資格而莫迂仍
守株以坐待恥爲奔競跡涉迂拘棖觸於懷編章寄託吁可傷也不知
政果有聲詩非泛賦均有關於世風習俗并可覘夫治法禮儀以視頌
德歌功梯榮獻媚詡詡以淑性陶情自負斤斤以模漢範唐爲能於斯
人之一行一言羣情之可歌可泣置若罔聞略不贅及何如也至味其

長壽縣志

卷十五 文徵上

一三三

詩有開府之清新無光祿之鏤錯極安仁之輕敏兼嗣宗之遙深符太
傅之閑情波瀾富有比秦州之雜感興致尤多流水行雲自然合拍含
華佩實不逞虛鋒洵媲美於前人稱不朽之盛事位置何等派別區分
當代詞人自能辨識羣年學究何埃臚陳茲者十三年之新集編成四
千里之鄉思已動大賢出處本蒼生福命所關廉吏升沈尤世運隆污
所繁欲求借寇例未許干此事推袁言非阿好惜公瑾虛傳識曲莫窺
宓子之音笑士安本不工文忝爲太冲作序附名驥尾殊愧蠅聲他日
付諸棗梨永爲楷模人才蔚起莫忘風雅之倡提邑乘增光庶免藝文
之簡陋也夫

此序撰於清光緒庚寅春三月時年八十有三

彭光遠李貞烈女徵文啓

嬰兒不嫁徹環瑣以事親小姑無郎鍊梅花而作骨是雖木貞不朽筍

孝堪誇而依戀晨昏罔識閨門大誼偷生天壤終慚巾幗完人如我邑
李貞烈女者一腔碧血千古香魂斯誠青史所未聞亦豈彤管所能述
貞女孝廉魯生先生之孫進士命三大令之女也祖作忠臣罵賊據廣
一文之席父爲孝子傳家題通德之門貞女學有淵源心如冰雪欲繩祖
武恨天不變男兒能讀父書別傳遍披烈女幼時父母病幾不起女焚
香籲天封股和藥深閨植壁靈神亦鑒其誠素手調羹疫鬼難肆其毒
及笄許字同邑楊郎緣結三生心堅一諾使其鸞鳴卜吉雁奠宜修豈
不甘憔悴於姬姜婉賢名于桓孟也哉卽或陰瑜早逝王烈先亡而字
檢皮金爭看香骨書留粉壁願返寒尸難忘伉儷之恩尙屬尋常之事
奈何青廬在望待佩瓊琚黃壤無情遽埋玉樹鵲有橋而未駕鴛成牒
而忽分恨海難填情天莫補斯卽別求良偶亦無防女史之箴愛惜青
年未必負郎君之約而女乃毅然自誓卓爾不羣足旣繫繩身將化石

天只人只請盟不二之心父兮母兮莫阻從一之志于是雲寰盡捲露
紛遙臨身未分明泣拜姑章于堂上性原剛烈拚殉夫壻于棺前徒以
血食宜延書香莫繼自憐薄命姑緩須臾抱姪承祧異腹終同一脈代
夫養母苦衷聊慰九原當夫雪夜燈紅霜天月白孤鸞罷舞別鶴哀鳴
魂斷藁砧人未亡而心先死躬操井臼婦雖巧而食難炊彈寡女之絲
愁增入畫墮思親之淚夢怕還家止言曲奏姑恩傳編女憲到底海枯
石爛天必相予任他荼苦薺甘我惟望子庸詎知類我類我方期永負
螟蛉可兒可兒竟至早殤雛鳳肝腸寸裂血淚雙揮痛天道之無知問
妾身之安託斯時也愁雲四面苦海千重佛不救人空喚菩薩于暮夜
兒姑待我將尋汝父于泉台固早已指黃土之一坏願言同穴看紅綾
之三尺矢志投繯無如其母董宜人病歷數旬氣延一息儻愛女遽聞
絕命恐垂危倍覺傷心不得已忍死歸家含哀視疾半身辛苦阿娘食

而不甘一樣悲酸弟妹牽衣而永訣及葬日女哭臨母塋魂飛弔鳳之
山慘聞天上頭觸髓漓之石痛絕碑前誓不再生羞教獨活執婦姑手
呼苦命而嗚咽難言戀小妹情檢嫁衣而分贈作別其父強迫始歸溫
語拊循精心防範女雖破涕爲笑實視死如歸囑咐家人夜已深而猶
譚陰教安排衣履身將殮而未許親知白璧無瑕朱絲畢命成仁慷慨
就義從容驚顏色之如生定登仙界料精靈其不昧直到夫墳異日者
綽楔增輝馨香食報江山草木長留姓字之芳兒女英雄足激鬚眉之
氣伏望儒林學士藝苑名流寫出冰姿維持風化或誇手筆富有千言
或吐心花妙惟數語曹娥碑好同題幼婦之辭少女風高更借文昌之
照

募修復龍山海天寺疏

海天寺者長邑復龍山一寶刹也山從天竺飛來寺是蕭梁造就靈光

長壽縣志

卷十五 文徵上

二五

殿古甘露臺高上出重霄紺宇偕珠宮並敞中無雜樹黃花與翠竹齊
芳無如碧海忽枯青天易老風衰象教月冷龍華鹿女微行悵曇花之
凋謝鵠王小住驚伽葉之飄零住持普清卓錫多年鑄金少力梁從天
降禱玉筍以無靈樹共山移呼嶽神而不動雖錢傾布袋衣典袈裟香
種木犀漏繡銅葉分雞園之清供復鹿苑之舊觀石漸點頭佛將豎指
然而車名五術非一木所能成也水號八功非半瓶所能濟也爲平地
之山纔輕覆篋造諸天之塔尙望合尖於是託鉢出不二法門渡盃遊
大千世界求不施之捨城入化人唱無緣之慈場開選佛伏願大宰官
身諸善男子床登四大結蘭若之因緣石話三生憶檀越之慧業或解
蘇子瞻玉帶留鎮名山或發范文正窖金培修古寺儒能助墨須知會
本無遮佛亦依人莫道塵真不染庶幾地開十笏光合千燈貝葉繙經
依舊認兜羅之手蓮花湧座從新捫卍字之胸辟支果落而重生菩提

樹枯而再發禽能填海石可補天布給孤獨之園但願金同身捨勒玉簡栖之碣更看寺建頭陀

李滋然查覆南海舉人康祖詒新學偽經考文

案奉札開光緒二十年七月廿日承准軍機大臣字寄奉上諭有人奏廣東南海縣舉人康祖詒所作新學偽經考一書離經畔道惑世誣民非聖無法煽誘後進又自號長素以爲長於孔子素王其門人有超回軼賜名目請飭兩廣總督查明革辦銷毀原書以維世教等因寄諭到粵准此查有准補廣東電白縣知縣李滋然品端學正經訓明通堪以委查爲此札仰該縣札到速卽赴坊間調取康祖詒新學偽經考一書有離經畔道等情詳悉查核分別籤明稟覆以憑革辦等因奉此遵卽親赴書坊調新學偽經考一書詳加查核此書大旨以尊崇孔子攻詰劉歆增竄六經爲主所謂新學者劉歆也所謂偽經者易說卦序卦雜

長壽縣志

卷十五 文徵上

一六

卦古文尙書毛詩周禮左傳爾雅書序皆歆偽造也推之至於漢史說文等類皆以歆爲藍本自命爲二千年未有之卓識全書援據之博讎校之精深思銳入洵可稱堅苦卓絕但自信過深偏見遂執有不合己意者則妄加竄改有不便竄改者反誣爲古人所竄入夫劉歆增竄周禮事或有之然亦非全書盡出劉手至因而推及六經古學盡屬贗鼎未免立言過當甚至兩漢名儒輩出著在史冊一概抹倒專崇博士今文夫古今殊途學分二派源流家法師授不同此經學之大綱也右此左彼堅持己見猶非通學况于同己者則遵之異己者則斥爲偽經深文剖擊不遺餘力豈足爲定論乎今就全書詳加校閱有不可據者十條籤帖原文恭呈大鑒如二編云伏生書爲孔子正傳此孔子書學存案後有舍伏生而言書者可引此案決之等語是直謂書有今文而並無古文矣按書分今文師說燦陳攷證實多伏生今文固爲孔子正傳

古文尙書亦不得盡爲劉歆僞撰今世傳本雖東晉梅賾纂輯而散著古籍如允執其中見於論語人心之微道心之淵著於荀子豈論荀亦皆歆本乎又况史記所引古文書篇甚夥卽伏生大傳亦引九共篇語謂古文散亡眞贋雜出則可直謂古文竄尙書之名皆僞未免迹近武斷其不可據者一二篇上以費易爲劉歆改並序卦雜卦二篇亦爲歆所僞託及按藝文志云施孟梁邱經或脫去无咎悔亡惟費氏今與古文同是其與古文同者纔四字耳此四字與劉歆有何交涉而必竄入該舉人易主今學而施孟梁邱三家明有經十二篇何內女子明言得序卦說卦雜卦三篇乃並今學亦指爲僞尤爲自相矛盾其不可據者二又云毛詩至平帝時乃突出志云又有毛公之學自謂子夏所傳託之自謂不詳其本師其僞一等語凡數千言大抵謂毛公并無其人均劉歆所僞造按毛詩至今尙存明有其書明有其人何間獻王紀載甚

悉其曰大毛公小毛公者亦如先鄭後鄭大徐小徐之例乃以不稱名而疑爲亡是公不知何據而謂獻王傳之不可信堂堂正史而誣其造僞事並造僞人其不可據者三又云至周官經六篇則自西漢前未之見史記儒林傳何間獻王傳無之其說與公穀孟子王制今文博士皆相反莽傳所謂發得周禮以明殷監故與莽所更立法制略同蓋劉歆所僞撰也等語按周禮六篇本有劉歆增竄語以其封國田制細節與孟子稱周室班爵不同然出軍之數細核之實采用孟子王制春秋公羊之制以作綱領至微文末節多譯改以符本經文例此則不能曲爲之諱也謂今世所行之周禮眞岐出今古集廟不能如儀禮之家法完備則可若謂全書均出劉歆僞託則固無其理也至謂五經史漢半皆劉歆僞爲稍有識者亦必疑而且怪五經詞義類皆博大精深經緯天地本非劉歆所能以孔門垂教之書妄指爲新賊僞造語其不可據者

四三篇下云自鄭康成雜合古今則今本論語必有僞又如巧言令色足恭左邱明恥之丘亦恥之匿怨而友其人左邱明恥之丘亦恥之一章必劉歆僞竄該舉人以劉歆有左邱明好惡與聖人同一語遂疑此章亦劉歆所竄人注經家凡攻人作僞竄入者必得真書原本校之乃可定案如漢人以中古文校張霸僞書是也若僅以莫須有三字定劉歆獄豈遂可爲鐵案乎其不可據者五爾雅與說文相表裏後儒得考篆籀之源端賴許慎之力該舉人既以毛詩爲僞說文引詩宗毛爾雅亦多釋毛詩作者欲自圓已說不得不並說文爾雅亦斥僞劉歆所僞撰所附因甚其詞而謂古無篆隸之名但謂之文牋名而抑揚之實自歆始不知許慎撰集說文至於矜且慎博采通人凡十九家不盡在劉歆後安得謂盡屬歆創始乎其不可據者六四篇云歆陰竄左氏國語爲編年至以滅其迹云云該舉人所斥劉歆者如此不知此漢書二傳皆

長壽縣志

卷十五 文徵上

一八

班固之筆非劉歆書也是真李代桃僵矣自主今學于是于各經各史中凡屬古文顯證悉以游詞竄亂之以曲證已說其不可據者七五篇劉歆修六藝略既盡竄僞經徧布其中矣無如僞書突出師授無人將皆疑而莫之信也於是分授私人依附大儒僞造師傳假託名字彌縫其隙密之又密所以深誥人信者在此然范升已謂左氏師授無聞矣等語按漢書儒林傳武帝以前與史記無甚岐異昭宣以後師傳史遷在所不及至范升謂左氏師傳無聞儒林傳明言敘左氏師傳自張倉賈誼至尹更始劉歆傳班固亦言歆校祕書見古文春秋左氏又况班固以前史遷明言邱明因孔子史記成左氏春秋此在歆以前卽有左傳明徵乃必以爲國語既定爲國語亦非劉歆所造何以仍指爲歆歆之書其不可據者八傳經以通學爲據該舉人論經明斥兩漢通學爲僞既以漢儒所憤攻古文者爲僞至此文列傳習古文者廿餘人則

是憤攻者尙少而深信者反衆憤攻者既見其爲而傳習又言其僞反覆其詞未免自相矛盾鄭元酌古今文著爲經說精深詳慎今乃謂鄭學既行後世咸奉劉歆之僞經而孔子之學亡故康成者劉歆之功臣孔門之罪人以歸獄劉歆乃至西漢通學名儒無不遭其詆毀許慎本傳字學乃因說文中載孔氏古文亦嘗爲劉歆干城許慎東京大儒去劉歆絕遠其授學源流亦異因詆毀劉歆而并周內及之尤爲過甚其不可據者九書序出於孔壁伏生之本無之然古今同一書卽同一序此顯有可驗陳壽祺奪孔序而專屬之伏生辭而闢之是也若因此遂謂孔壁實無序爲劉歆所僞造則大非又謂廿八篇卽孔門足本書序之僞其謬有五不知是書引尙書大傳孔子所稱六誓觀義五誥觀仁等語盡皆合今文篇目則大傳中明述百篇書目如九共帝告湯征仲虺之告等類不一而足乃改六作五以曲就已說則非孔子之言矣其

不可據者十該舉人以漢書所載公孫祿有劉歆顛倒五經一言而又讀近人書過多於羣經家法分途自以爲悉探堂奧師心自用自詡爲讀書得間遂慨然加之劉歆甚至許鄭大儒而亦痛加斥駁立言過當卽摘有由來滋然細查全書詳加校閱其立論雖主詆漢儒其大旨猶爲尊孔子若律以離經畔道則全書并無實證伏讀聖朝功令文人著書立說其有詆毀程朱顯違御案者則應亟行毀板不可聽其刊行如毛奇齡四書改錯之類是也若漢魏諸儒門戶是非從古水火今文古文排擊聚訟自漢訖今實難數指鄭元爲東漢經師王肅難鄭不遺餘力宋儒歐陽脩葉適亦嘗攻周易說卦序卦雜卦之僞朱子亦疑周禮爲劉歆所修改胡宏林黃中更疑爲歆僞作國朝閻若據古文尙書疏證王鳴盛尙書後案孫星衍尙書今古文注疏魏源書古微皆攻古文尙書之僞劉逢祿之左氏春秋考證萬斯大之春秋隨筆攻左傳之僞

者也魏源之詩古微攻毛詩之僞者也諸書皆經儒臣先後奏請或收入欽定四庫全書或採入正序皇清經解雖提要所標詳不無疵議而聖朝寬大類皆糾其誤而存其書該舉人僞經考不過就各家成說折衷己意而推闡之滋然細考全編罅漏實多如尙書異同真僞表所列十六篇僞古文篇目僅有舜典汨作九共大禹謨允徵湯誥伊訓武成罔命九篇而缺去棄稷五子之歌咸有一德典寶肆命原命旅獒七篇其疏漏顯然可見雖自命甚高而著論無堅樸不破之才立說渺瀕博周匝之筆故刊板已行而信之者少若據目以非聖無法惑世誣民不特該舉人罪不至此卽取全書之詞義以觀亦斷不能到言僞而堅行僻而辯之一境卽使其書具存亦不過一二門徒互相標榜而已至謂其能煽惑後進靡然向風如是書之前後乖違自相矛盾尙未有此學力也至該舉人以長素爲字已自童年因其行一故爲長粵中士人皆知之蓋取文選陶徵士誄長實素心之語非謂長於素王也又徧查全書錄稱門人姓字者不一實無超回軼賜等語確係外間詆毀譁笑之言謹據滋然見聞所及詳爲述呈可否免于銷毀之處恭候憲裁

長邑傅氏族譜序

辛壬癸甲之年阨遭陽九運邁百六余以亡國大夫祝髮爲僧早已親朋無字故人書絕與世睽離萬緣悉屏矣乙卯夏五傅君星奎復以重修家乘屬弁簡端傳故吾邑望族與余爲外祖家星奎又翹楚而忝葭孚者也敢敷摛藻之詞勉副問旨之請見其支分派合綱舉目張仿古眉山具堪取則問今肉譜誰與爭長撫此一編實業二美夫阮分南北貧富懸殊裴號東西炎涼迥隔集豪宗於仙李誰關魚川問屬籍於諸韋羞稱章犢往往一睽桑梓各樹枌榆卜鄰而久已離鄉數典而居然忘祖鳴夷去越便號陶朱張祿入秦誰知范叔傅氏故居楚水遷籍巴

江猶沿七澤之名不改三湘之舊入烏衣之門巷仍是謝庭問青箱之世家可稱王氏不必門顏雲夢山改竟陵而里舍惟傳鳳嶺之居雞犬竟識崇陽之市此一美也其或鋪張門第附會膏梁桑依柳而寄生鳶施蘿而同命勢必鶴兼梅種狐帶令頭分梁公之告身榮誇狄斐詭汾陽之後裔拜下崇韜有玷清門何裨新牒彼傅氏向遭兵燹惟贖宗圖沿波討源修廢興墜而能不攀顯秩獨溯前修法古史之缺文成一家之實錄觀其自序有云前人未探其實則混修無功後人幸察其詳不修有罪故言皆實錄本之紘開宗兩公之舊譜續厥宗派詳敘繼繩雖登文肅曉窗之文追述顯祖錄紫陽子靜之序亦溯前徽而宗支敘始於元明紀錄悉根乎采訪情因收族事鄙瀆宗以視他族之葛蔓成藟瓜皮搭李肇封微子旁支分先聖之尊累葉軒轅華胄亦帝王之後舉世攀附莫之與京滿紙虛詞萬難表後者判天淵此二美也今者一線

長壽縣志

卷十五 文徵上

三二

繩繩添丁不少百年鼎鼎算亥偏多或薤露之旋傷或桃蕢之新賦不勤采掇曷聚宗盟然而劫慘紅羊災罹青犢妖鳥鳴而遽成焦土蠱沙化而倏變遊魂田宗之鐵籠爭途羅氏則衣冠掃地若斯譜者恐六丁之攝能無散作秦灰問二酉之藏誰暇收同魯壁而乃雲初遞嬗風景無殊歲一星其已終食千指而愈盛藻芹春雨年年鸞嘯之鳴禾黍秋風處處遯蹄之祝遂使祖庭繼美宗牒流光排比得人纂修不紊求之晚近蓋罕其儔以視前此之殘帙僅存椎輪有待其美備又何如也至於綸言世守祖德能承續有楹書圖傳統系全編具在奚事揚葩遺澤方長可知後葉簪纓永紹早誇鵲起之先聲族籍蟬聯應勝龜山之舊錄旃蒙單闕之歲皋月下浣故國逸民方外采薇僧序

梁啓超覆李滋然書

啓超新會人

敬肅者昨奉手書拜聆一是前歲先嚴見背蒙賜輓聯其時苦經昏迷

茹哀叩謝已託羅君廷輔代達今奉惠示以保全優待條件見責競誦再四慚悚莫名復辟一舉過拂輿情不唯國體動搖陸沈將及且謀動復戾危及乘輿縱得俄延所誤尤甚故不得不早期安定以全其大此衷隱慨匪言可宣至優待條件泐等信條去歲且議附列憲法以垂綿久雖奪門變起浮議囂騰而溯其初意既非起於宗潢篤其舊思當無刊於國典啓超二十年通徒唯知爲國廢興之際甯不恫然顧鄧林之計既窮禹域之沈可懼故使共和有包桑之固清室得帶礪之安亦卽所以酬曩昔景皇宣室之知區區此忱當爲吾師諒察連日於此正謀所以兼全之術也已與世伯軒太保徐菊人相國往返磋商冀獲保留可紆尊念年來浮世喪亂相仍吾師皈禮空門應多悲閱伏想藥爐經卷亦足葆制高齡惟蜀江兵火方殷杖錫往來百祈慎攝門牆回首立雪無從臨紙悵惶祇唯垂察

劉君錫劉氏合譜序

聞之魯衆仲曰古者天子建國因生以賜姓胙之土而命之氏諸侯以字爲諡因以爲族官有世功則有官族邑亦如之此姓氏所由來也嗣是而國建宗人家藏祖牒筆而書之志不忘也我族自陶唐受氏以來世不絕祀在夏爲御龍氏在商爲豕韋氏在周爲唐杜氏晉主夏盟爲范氏此本族也周衰而定王之弟王季子曰康公食采於劉因以爲氏其嗣定公夏獻公摯文公卷卷一名益一名狄努力國家功在王室召陵伐楚名震諸侯可謂盛哉然而周之子孫非屬陶唐後裔者此別族也至沛公興而西京昌蕭王作而東都赫玄德承基於蜀漢寄奴纘緒於建康其間各祖其祖而不盡承夫始祖自宗其宗而不悉繩夫大宗此又一屬而不一屬也若夫帝王子孫分封郡國各承所生不追自出兩漢二十四帝數十百王派別支分曾不知其凡幾又况繁衍夫三國

綿引夫六朝繼繼承承又惡能辨其誰屬耶總之諸侯不敢祀天子大夫不敢祀諸侯而公廟之設於私家非禮也他如婁敬賜國姓元海號漢甥以及赫連之父衛辰冒從母姓石晉之臣知遠混襲漢稱此則舍其本族而冒他人之族是又誣祖而自絕其屬也諸如此者其人聲稱赫濯非不焜耀當世然自君子觀之與其附而近也無甯推而遠之宋狄武襄之不附梁公君子偉之唐郭崇韜之拜認汾陽識者鄙之非其明徵乎又如三唐兩宋代有名人元室明家亦多碩彥將云是我族類歟惡得而知之將云非我族類歟吾又烏得而知之孔子刪書斷至唐虞非敢數典忘祖也荒遠之故聖人存而不論蓋其慎也記有之自仁率親等而上之至於祖名曰輕自義率祖順而下之至於禰名曰重蓋自天子至於庶人一是皆以身爲本其本亂而未治者否矣其所厚者薄而其所薄者厚未之有也然則合族之義可知已三代而上五世異

姓黃帝廿五子得姓者十四人爲十二姓不必合也惟聖人能以天下爲一家中國爲一人民吾同胞物吾同與無不合也由斯以言合族之義不更可知乎故有合而不合者同生異姓是也有不合而合者天下爲公是也雖然有等焉記曰天子七廟三昭三穆與太祖之廟而七諸侯五廟二昭二穆與太祖之廟而五大夫三廟一昭一穆與太祖之廟而三士一廟同昭穆庶人祭於寢而不得有廟限於分耳夫古之祠也有二其人懋功德地方尸祝之爲公祠也嗣能顯揚朝廷褒封之爲私祠也春秋列國大夫皆有祠祠之爲言祀也禮又云支子不祭祭必告於宗子宗子嫡子也又曰別子爲祖繼別爲宗繼禰者爲小宗小宗支子也據經此文宗廟之祭嚴矣哉嗚呼古道之不明也久矣後人之恪守也難矣誰非子孫誰無父祖而顧如是兢兢乎則變而通之聯而合之未始非奉先思孝盡于禮者之禮也且前人亦既舉行矣而不爲之

踵事焉可乎於是集諸譜牒綜覈本源條而分之會而合之仿尙書列代之體本太史紀傳之例各分部署各標宗主凡廿五族而總混合爲一祠同昭祀矣本生禮也我族端祖府君以前明嘉靖孝廉宦秦及蜀遂置業於我長壽渡舟場蟠龍山下其託迹爲最早明季獻賊之禍惟我蜀爲最烈清初底定移楚填川又惟我姓之來者爲最不一然皆散處各鄉未能合族亦未有祠也自我祖肇基於此四世而行簡公守助陽故士大夫七世而之復公鎮大定受朝名爵文治武功濟美四代然後得蒙封贈廟祀祖先始於吾邑鳳嶺之南作祠以祭而祠卽附公第之旁蓋以親俎豆便朝謁榮國恩也嗣公舉室之官寄籍遵義爰將我邑祠第屬姻親恆初公俾爲經紀暨嘉慶初城工告竣而試院無基時我九世祖清律公以邑紳贊公事同人謀埒於公公卽概畫祠左隙地一幅以奉是爲今之考棚公家亦不能聽公之獨爲義舉也爰贈金八

百以助我祠之馨香焉公卽以此款置城外余家坡土田半頃載糧三分作爲本祠常產以存公惠以示先澤維時合族同人聞風慕義踴躍贊襄嗣來城者恆薈萃於茲此合族之始也洎乎咸同而後年久剝蝕棟宇摧頹吾屬炯臣公時主祠事以身營鹽業暇日無多委族人文典公修理宗祠土木乃煥然一新復屬欽若公書寫神牌金漆重輝卽今之神楔祠宇也憶余十五六歲時應童子縣試從先大父聽鼓於斯密邇試場憩宿適宜未嘗不嘆先人之澤長而同族之和輯以樂也嗣是而子孫有不肖者蝸角生嫌於是有錢穀之爭詞訟之涉大乖我祖敬宗收祠之意矣今則列祖有靈天去其蠹乃能重修舊好敦睦如初慨老成之凋零撫嗣續之蕃殖承先啓後謀修譜牒不厭譏劣而猥屬筆於予予以閭族記載事體重大自顧日月逾邁深懼其弗克任也累辭不獲黽勉而爲之記其梗概云

李鼎禧廖樹勳傳

廖樹勳字子亞金堂人清季實行革命者也光緒三十二年自滬上入同盟會回川謀舉義至縣初就清靜菴私立學校聘繼就起鳳學校俱爲體操教員時高小校任體育者爲羅鳳祺密與結合極注目於校之所有英國毛瑟槍彈時空拳無所藉手得此足以自豪也復慮鄰縣無人響應宣統元年往就大竹聘二年轉長壽三年鐵路風潮起日夜密造炸彈樹勳旋至渝與黨人約謝持等復至長決由縣發難九月廿八日首樹義旗不數日而重慶軍政府立矣當召集紳民會議公推樹勳爲司令官七鬯不驚而一切草創規制略備收民團練丁約千餘人始以兵法部勒之復得端方所帶後方馬隊湖北陸軍排長夏殿颺等爲之教導公然成營伍矣樹勳以梁墊至萬猶爲四川巡防軍所扼守頑強不任響應決計率師討之至梁山駐軍楊占元假意迎降次日卽設

長壽縣志

卷十五 文徵上

三五

計戕之全部潰散樹勳在一逆旅方上馬而槍彈兩集陣亡以死當由知縣某棺殮之暫殯東門外未幾占元正法及全川肅清乃改葬于渝之浮圖關蠶神祠歲卹金如例

長壽縣團練養成所同學錄序

洪楊之掠湘楚而東也湘鄉曾氏以在籍侍郎奉命辦理湖南團練旋即帶勇出征至於勘定大難湘軍之聲震天下此團練之名所以膾炙人口也夷考其實曾氏之所申討而提繫之者謂之鄉勇則可謂之團練固已非矣蓋鑒于勝代綠營之弊提鎮以及卒伍皆麻惰不復可用乃練勇以爲廓清本源之計其統將壹任咕嗶矜裊之徒故能耳目一新其精神乃振迅無前官兵往往望而奪氣若竟以團練目之則曾氏書中不應屢謂團練不足深恃又嘗致緘湘鄉令謂祇宜團而不練如古所謂保甲其職任在清戶口詰奸暴嚴防守申號令而已至如練之

成軍則固未之許也雖然此有標本之說焉曾氏所丁如瘡痍已經潰裂非急于治標則壞爛及于全身而呼吸且不可以苟延當時軍備廢弛勢不能不施以興奮之劑以決其擁腫而藥其不仁若病未瀕于至危而中于微隱者已深矣此不圖害且立見也又非治本不爲功今標本並棘吾人既不能如曾氏之快刀闊斧立起沉疴則辦理團練以固其根本是爲急先之務此有識者所深韙也顧既曰團練則必有團焉練焉之道在又不能膠曾氏之言謂團而不練也誠若是則第言保甲可矣何以團練爲二者兼詮其旨趣其效用奚翅倍蓰三代寓兵于農其庶幾乎古者蒐苗獮狩皆于農隙以講武事一範以禮使民日習于軌物而不敢爲非隱隱然無形之壁壘悉具於耨鋤阡陌之間國家有事按賦出兵無或不至事過仍歸之農以習其方略強其筋骨作其忠義者無或不聞井田之法與學校造士無殊旨也後世兵與農分召募

之事起而天下遂騷然多故矣本邑公選李君俊武任團練局長以爲振興團練莫切於預儲此項人材爰有養成所之籌設糾各鄉之有身家而少壯識文字者都百二十人入而習之分學術兩科修業期爲一年凡屬於軍學操典及技擊柔術罔不備具其扼要者尤在於精神講話團練之旨趣之効用異於軍事動作胥在於是歲月不居不移瞬而業已成諸君子有同學錄之刻俊武丐余一言弁其簡端余因撮其大要并述曾氏之說以相切劘吾知諸君子必有好學深思神明於兵農合一之道而不爲曾氏所謀者抑今軍閥專政至不惜害於而家凶於而國爲天下人共棄矣異日於團焉練焉之道交營而并進不至流於團而不練爲識者抱無窮之隱憂則大幸已

周立鼎傳略

君字銘鐘性伉爽持論能持大體不類卑污賤者初由縣立乙種農校

畢業旋卽分任學監教授後任校長多所成就及被選爲縣會議員隨任副議長未幾議長楊重持君出任軍職君爲議長歷時較久君以一身担全縣安危遇官廳籌款侃侃以爭減輕乃已時與議者或病之謂君露才揚己每集議由知事或駐軍長官主席首先置喙者必君及君去而議場乃噤若寒蟬矣官廳惟宣布命令無所謂議也馴至逕以命令行之并無事於召集也君之最蒙不自者時有某某團之目以君爲之魁而君固不知也有此標幟忌之者乃陰銜之矣丁卯夏范師隨楊森軍援鄂君受衆託至萬請命適楊已東下不辭勞瘁直往宜就謁吾縣軍團交訂之事起焉及秋偕范以歸長師部祕書忌者因愈益側目及出而監選至葛蘭場狙擊者環而伺之晨次往普子場半途出手槍中君立斃士論惜之

涪陵蕭湘李鍾璜傳略

長壽縣志

卷十五文徵上

三七

李鍾璜字渭侯長壽縣稱沱場人也先是長壽李氏有二大宗一名文質一名應愷俱由楚入蜀其時代皆元末明初籍貫里居不大舛異疑其一本也文質世居負郭子孫繁衍明清兩朝科第仕宦稱極盛應愷所出祇正德間一人名章登科官參政其後潮遠以武舉任雲南都司子長洛名楮以武進士任提塘官及鍾璜之曾祖長仲伯祖樹勳相繼武科聞長仲爲祥遠之第九子幼失怙恃家中落赤貧其兄長青繼之出以星術求食至太平寨居焉長仲生而岐嶷性孝友賢鹽兼習射及中式已駿駿稱小康矣入京會試見朝廷方古文謂武官技擊非以式子孫也乃罄所攜資斧購書盈篋歸生子三家訓家語家謨訓生廷藩廷夔廷嵩廷琛廷賡廷相廷霖皆研通儒術藩夔賡入文庠食餼霖仍爲武學生員廷琛生鍾璜以伯叔仲昆皆以文章名鄉里劬於學久乃獲售以貧故課徒自給先後設帳四十年不厭不倦諄諄以克不致

用爲訓不專以帖括見長也中年從族人滋然治經於毛詩故訓周易許書皆極有心得當時滋然經學噪蜀東從之肄業稱高第弟子鍾璜與韓元愷也以明經終識者惜之晚年其子鼎禧能世其業始輟教授雜治醫卜及堪輿諸術蒐集百家之書手纂錄之不稍怠嘗謂世變方殷學術禮教且日裂吾輩衿衽之士既不能障此狂瀾若竟與之同流可恥亦可懼也故居鄉黨宗族間一以顏習齋曾星崗爲法衣必樸素食必簡約出必步行居必痺隘惟祀神祭祖必誠必敬與人解紛不畏不侮之貧弱者無不泣涕沾襟以爲失一保障也烏虜所謂一鄉之善士非耶

李寶士李氏三烈婦寶士貢生

史氏記載有忠孝節烈道學儒林等列傳吾欲通此例以作家乘其他尙待深考先於閩閩之秀得三人焉其首則李明識之妻甘氏以死殉

長壽縣志

卷十五文徵上

三八

夫罵賊不屈雖古之節烈又何以加焉其次則李明賞之妻華氏撫前妻之子施及諸姪能不妬嫉賢哉淑媛也厥後李恆芳之妻左氏深痛夫婿之喪明力阻父母之悔婚非眞知從一而終之義者乎之三人者皆無後而其賢實足以稱雖謂至今猶存可矣

向名鎮自敘刊西來寺壁

光緒甲午春余設館廟內見房宇毀壞花園一帶土石疊山久雨則遍地泥濘無可容足余始同殷君子猷募捐補修重建花廳兩廊設書齋十餘所墜壁開窗煥然一新住學生數十人朝夕講論亦樂事也是年除夕余因正殿神像三尊題春聯曰佛祖本慈悲朵朵蓮花開世界帝君分文武家家桂樹錫科名遂於此課讀十餘年至乙巳余同戴君壽田韓君次春往沙坪寺創辦學堂乃去此焉繼又就邑中官立高等學堂數年歸里韓戴二君相繼去世其餘在高等學堂與余共事有年不

相上下者如孟君洪波殷君華廷彭君鳳和鄧君仲述亦皆作古吁嗟哉盛年不再一轉瞬而良朋寥落人生真若朝露因將昔年手撰春聯增添普渡衆生廣行陰騭付刻補壁作爲紀念云爾再余館此地時至聖孔子像在佛祖坐後久欲移出乃中大觀爰集會捐貲曆年祀享惟俟會本盈餘再行將花園內設神龕置香位焉時余春秋已經六旬未果撫心缺然是望會中同志者補之

按向君沒後其門人邑增生張殿宣等爲紀念其師於西來寺集貲設長生會春秋祀焉殿宣爲之序

長壽縣志卷十五

文徵下

杜甫 字子美唐人

黃草峽

黃草峽西船不歸赤甲山下行人稀秦中驛使無消息蜀道兵戈有是非
萬里秋風吹錦水誰家別淚溼羅衣莫愁劍閣終堪據聞道松州已
披圍

范成大 大宋人

大熱泊樂溫有懷商卿德稱

暑候秋逾濁江流晚更渾瘴風如火熈嵐月似煙昏城郭廩君國山林
妃子園故人新判袂得句與誰論

巾子山又雨

長壽縣志

卷十五 文徵下

一

百日籃輿困踟躕三晨泥坂兀躋攀晚晴幸自墊江縣今雨奈何巾子
山樹色於人殊漠漠雲容憐我稍斑斑如今祇憶雲溪句乘輿而來興
盡還

張士環

張桓侯刁斗 上有八分書侯所書也詳桓侯祠

天下英雄只豫州阿瞞不共戴天仇山河割據三分國宇宙威名丈八
矛江上祠堂嚴劍佩人間刁斗見銀鈎空餘諸葛秦州表左袒何人復
為劉

僧雪菴 明人

謝某餽柑

棄却春光獨愛秋至今不改縐眉頭主人若把金刀剖點點酸心對客
流

白鷗

獨立沙邱雪一團被風吹得骨毛寒想他未到忘機處水動還須側眼看

喻時

吳皋人四川巡按使

同近臺張侍御竹崖李僉憲東岡余副郎登北真觀煉丹台得一絕句
石屋蕭疎丹竈虛寶台縹緲白雲居相逢不侈刀圭事且與占星問麴車

峯頭列市零千疊檻外長江天一涯聞說神翁今不見綠煙深處是仙家

戴錦

侍御梅國樓宴翼侍御文選於北山

握手孤亭思渺然北山曾此駐真仙談深座上雙龍合望遠江亭獨鳥

長壽縣志

卷十五

文徵下

二

還柱史遙臨添紫氣遊人長笑踏蒼煙天風颯颯吹青鬢跨鶴相期到日邊

王長德

字麗田明人

偶見

衆芳既墜不上枝清流一去復何時花飛水面難爲數水載花光空自知
搖漾半因風雨惡飄揚日使紅顏薄落英逝浪兩忘言幽情偶對增寂寞
同是天涯偶相值閒持此意誰當識辭故就新理或然惆悵人間無住迹

亂後山居三首

晨光猶白及柴門爲照琴書意已暄曝背支頤宜野老塗鴉散帙任諸孫
濤聲時出松千杪籬畔聊依竹一垣閒看璇題名勝地高雲春曉正翩翩

我形我影自周旋莫更書空莫問天荒徑新泥頻過虎愁腸舊結怯聞
鵲春深蘭氣隨風遠山靜泉清竟日懸一片寸心千里道倚筇惆悵却
難前

小園卉木長春芽但息微躬願不奢永晝每閒思對弈長鏡初就欲鋤
瓜未成詩句形先削况值兵氛衆且譁去住無端難早計翻憎燕子慣
營家

李開先

癸未公車有阻迂道歸里途中感賦

春山日日子規啼久客停雲憶故蹊別路傷心衡雁北歸鞭極目錦江
西他鄉歲月移梅柳故國烽烟動鼓鼙聞說干戈連鳥道王孫歸去草
萋萋

使者歸自滇南

長壽縣志

卷十五 文徵下

三

使臣東下已經年萬里南還向日邊雲傍馬頭開白帝山迴鳥道廓青
天將軍捧詔爭推轂父老扶筇願執鞭最愛朝宗江漢水布帆無恙是
張騫

李士震 邑孝廉

題蘭木院

古寺幽深鎖翠霞菩提無樹識僧家誰教枯木蘭芽茁怪道當年說雨
花

滕之倫 黔中人

題行人楊喬然別業

郭外水之涯先民懷葛家設籬依鳥雀曝網見鱗蝦粉退初攀竹銀封
未嚼花試僧入定否溪故弄喧嘩

李瑞鶴

在黔遇同井人感懷故里

客路逢迎半故鄉停車道問轉悽傷幾年雁陣離寒浦何日鶯聲話短
牆小徑山橋愁夜雨孤燈野店慮秋霜相憐共作征途客人事音書嘆
杳茫

公讌行

已丑元夕普川聞警
與王稚泉夜飲漫賦

噫吁兮今夕何夕叫饑嗚嗚聲哮嗷古城北城裏奴兒騁騎紫絲折
斷聰馬竹黑雲冉冉漢家池堂上翁雙醉叟鼓填填歌喁喁白鹿青麟
夜半脯玻璃瀉盡珍珠酒問君胡爲乎處幕若巢編茗是柳瘦瑱雙荷
迴不聞高燒紅燭冲南斗君不見昔日王摩詰凝碧池邊肝胆赤風流
才慧古無雙當時未免遭嘲斥又不聞翰林李太白清姿濯濯澄霜雪
永璘之繁幾流金千秋百代勞粉墨吾不憂西風勁颼颼只恐謔言猜
猜變蒼狗百疊青山起怪瀾馮夷蜃閣空中有君擊缶我且歌共醉舞

長壽縣志

卷十五文徵下

四

漫嗟娑百年生死鷺鷥罽覆雨翻雲奈若何若爲吾飲吾爲若壽紫雲
在左雪兒在右檀槽撥盡鳳凰聲琵琶滴曉鷓鴣難漏愁緒繁中難究噫
吁兮東方晝

王士禎

號阮亭新城人

長壽縣弔雪菴和尚

枳縣秋風愴客魂全川遺事忍重論誰從魚腹悲宗國唯有烏朝戀舊
恩葉下沉湘愁北渚燕生鄢郢出東門至今松柏灘頭水嗚咽寒潮弔
屈原

石如金

長白人

定慧曉鐘

八景錄二

古刹鳴鐘萬戶醒霜天殘月帶疏星山僧有意驚塵夢故遣鯨鐘斷續
聽

西巖瀑布

千尺靈源雪浪噴晴嵐縹緲鎖雲根閒亭坐看潺湲水流斷丹崖碧嶂痕

李以甯

崧山人

秋日贈九十一翁傳一先生

高秋清潔樂佳晨在暮居諸邁九旬待詔曾為前進士懸車竟效古遺民菊籬篇什猶存晉桃洞衣冠不記秦豈獨三巴名望重由來文獻屬斯人

其二

南極流輝泛羽觴膝前子姓共趨跽三千歲結新桃實五十年穿舊板牀天為斯文留碩果人從異代見靈光吾宗仙李君門盛老圃秋寒晚更香

長壽縣志

卷十五 文徵下

五

其三

花甲開除三十年更從一畫悟先天碧花老放芙蓉驪山野幽尋薛荔峯自有猿猴同綺季莫將服食問彭篋丰姿玉立今何似謾謾長松海

鶴翻

送韓素五之開化

同時捧檄看先鞭君去三衢路幾千策騎遠從江左縣攜琴更上浙江船訟庭吏散喧聲寂山閣雲深爽氣連我到越中應過訪披襟共話藕

花天

李徵濤

題東山廢寺

當年古寺簇雕梁亂後凄然瓦礫場斜徑一灣惟井在名園幾樹待茶香野塘蛙吹生人寂煖日蜂聲過客忙極目家園頻灑淚連雲甲第總

荒涼

李泉儔

遊白崖

誰云野老無幽致築室偏於怪石中曉汲山泉頻煮月暮鋤崖翠自批
風酒澆勝地杯嫌淺詩怯春寒句未工獨喜主人能好事重來欲踏屐
邊紅

李世燕

錦山草堂

錦山高枕是吾廬斗室蕭然興有餘薛荔藤牽忘歲月芝蘭香綻藹庭
除漫研竹露新裁句獨坐松牕老著書最愛一溪蒼翠好憑闌把酒話
樵漁

劉慈巴縣人

長壽縣志

卷十五文徵下

六

謁桓侯祠

入廟瞻遺像英風迴出羣義生顏太守禮愧馬將軍刁斗名猶在長矛
技不聞祇今江上水歌吹日紛紛

吳崇

輓華成實先生

當年烽火逼孤城甲第元勛盡解兵慟哭臨戎無壯士從容殉難有書
生殘軀已逐秦灰冷遺烈還同字水清今日江頭追往事豐碑猶記漢
臣名

張問陶字船山遂寧人

養蠶堆

養蠶堆可憐顏色如死灰江心扼水令水怒能挽奔流使回住萬年長
作江之蠹君不見西陵城東大波起長江一瀉五千里江出夔巫江亦

喜

送李平山太守任杭州

有用真才少期君不負官
馭民能簡要領郡自清安
琴鶴虛名小風塵實政難
贈言存古意慎勿笑酸寒

送韓樹屏侍郎省親歸長卽題秋江歸棹圖

還山原比出山難回首鄉雲路渺漫
歎我潘輿方送別羨君萊綵去承
權鸞凰對影增蘭膳豺虎空羣避
豸冠峽雨濛濛歸棹穩尺書珍重報
平安

余暹

煙霞石

昔登峨眉巔佛光匿其跡南海有蜃氣
航時惟潮汐於茲暫往還未暇窮奧
頤北山之煙霞與我違咫尺苔蘚日夜
侵祇今餘片石山深花自

長壽縣志

卷十五文徵下

七

紅寺古雲空白入景此最奇胡爲久祕
惜應如懷珍士黯淡無色澤顯晦不足
論英華期厚積但使著榮光燭天驚赫
奔靈蹤鬱必昌拂拭露氣泌佇看射斗
牛一慰探幽癖

李莒

字小侯

遊北真觀

閒從禪院印禪心時倚闌干聽梵音
石上虹霞還隱隱松間鶴夢自沈沈
人淪孽海憑醒醉佛守荒菴閱古今
笑我塵緣猶未了蒲團暫借息煩襟

胡益之

宿榮齋韓二丈山館凌晨觀雲海

伯休隱瀟陵一廬風雨來良朋退之游
太華千秋山水留佳話周家古寨絕
崖壘朝朝下視雲鋪海榮齋韓丈邀我
來同看曉氣騰光彩初拖

匹練濯水漬須臾萬頃玻璃紋天女裁裳濃熨貼神爐煉液漲氤氳水
銀湏洞瀉十里山沈谷覆漂難起平浮雉堞三版懸突兀屋樓百尺倚
怪石崖前虎豹蹲白衣斜挂蒼狗奔斷處仍連缺處補峯尖萬點橫吞
吐蠹蠹糊頭湧口來三千犀弩射難回迥疑廣利朝金闕素車白馬齊
安排龍騰蛟掣爪擎空古樹虬枝混養中銀臺出沒飄風轉嶺容纔露
又全封時汗漫更延斜遠測崖畔無津津天地混茫一氣裏破浪思浮
貫月槎忽聞笑語喧空際應有鮫人列海市冰綃霧練燦玲瓏欲買無
由成交易靈幻離奇供清賞微驅直似千霄上韓丈呼勿高聲言怕有
海若來尋訪

過旌表節孝孔吳氏墓下題句

忠臣不二主烈女不二夫乾坤鍾正氣節概凜相扶君不見孔門母吳
氏姝生前卅載冰霜節身後千秋俎豆特旌閭幼嫻女誠德並瓊琚鏡
鸞纔合釵鳳旋孤誓將從夫子於地下爭奈膝前啼幼子堂上老孀姑
夫棄妾妾育子姑有婦兒不死紡績供肥甘丸荻課書史子然家計苦
支持平生慈孝終如始佳城毓秀草木流芳芝蘭蔚立如睹義方我來
坏土一下拜祝母精英長在以鎮萬古之綱常

黃嗣斌

遊觀霄洞

通明何隱君蒼蒲古鼎烹松雲巢父尋禹穴仙靈幽窟參丹訣咄咄立
齋更嗜奇慣尋山水入詩脾芒鞋跋足杖拄手踏徧蜀山九十九約我
同遊古洞來洞口羣峯萬笏陪欸欸迎人叢桂發幽艸閒花擁碧隈叢
桂小山初破萼濃桃帶雨已全開呼童抱火聯肩入當關虎豹人面立
犖确奧竊磴道懸葉生步蹇衣先溼捫石且復行危無跬步平突有寶
塔玲瓏立鬼斧神工削不成遶塔之西下峽口驚飛蝙蝠大於斗頭上

何見欲墜不墜石蔥蒨四壁何所有巉巖怪石列前後或如鳥獸之飛
奔或如鬼魅之奇醜青鸞黃鶴銀麒麟去復去兮仙之人藥爐丹竈封
苔蘚誰從此處得歸真予東行百餘步崖平洞合疑無路忽然磴道
盤虛空石門翻在最高處擁火獨立氣頗伸立齋喚我且逡巡古來快
意須知足此中我是過來人自茲以往途盡惡難行甚似人情薄飽聞
瀑布陰轟雷瞥見陰河來鬼舶石有鋒稜水有波稍一蹉跌可奈何况
復髑髏纏石笱得非蛇龍出沒多我聞此語深拜服急尋來路出幽谷
從今幸絕險巖途險巖途中不插足

李長仲字大空

題大夫岩

大風原名何似大夫賢泐石題名已十年手澤長留三字永口碑欲借
萬人傳人間墨妙真遺跡塞上園林接野煙自我揮毫餘興在補鐫詩

長壽縣志

卷十五文徵下

九

句緣蘿邊

今字跡已
浸湮盡矣

聶鳴鑄和邑廩生

桃源洞

見說桃源洞其中別有天淵明與摩詰開口不離仙兩人賢且古誰敢
議其偏我更進一解以爲未必然當日避秦客麗不計萬千胡爲此中
人獨占此田園樂溫非武陵桃源景亦雅古洞白雲封四面飛泉灑到
處捕魚人不聞遇仙者

題陳節婦詩失名

奪刀爭死瞑夫目罵不絕聲寒賊心多少男兒應跪拜借君鈇性作忠

臣

楊慎字升菴新都人

青城五老贊譙定

天授韜奇入林結芙蓉鳳兮翩翩鱗之儀儀年百廿歲有嬰孺姿山癯淵
槁奚可同之

韓鶴壽

題文昌宮石壁

高閣凌空鎖碧苔觀瀾門戶倚江開忠臣節概留金石孝子聲名著鼎
台放眼山樓通肄院垂頭蒲葉薦新醅生成欲報君恩重莫認科名祀
斗魁

胡超

字卓峯

達州吟

兩湖教匪未肅清三槐滋擾刀鎗鳴添得屯聚張家觀烽煙起時日不
明袁何總鎮去對壘鐵甲三千賦采芑奄忽壞雲覆大營戎馬蹂躪紛
紛死主帥不祿將士摧漫山流血成海水彼衆我寡力難支往往鬼哭

長壽縣志

卷十五 文徵下

一〇

天陰裏霧暗月黑不見天全軍皆墨有誰憐除夕報道東鄉破今年離
亂復明年衣冠士子陷鋒刃少婦兒童絕性命中丞束手無良謀霜滿
于思滿雪鬢陡聞援師壓境來創痍皆起笑口開賴此軍心得慰藉渾
如雨霽轟春雷續調滇伍并黔矛吉林庫倫集驂騶天上已頒經略印
閭閻羣瞻拜冕旒弓劍在腰旗在手桓桓壯氣冲牛斗旌旄捲處風飄
騷鐵騎追馳蛟龍吼捷書疊奏慶綏豐重開漢川故道農歸畝
塔巴墩巴什瑪雜獲逆首卓霍爾奉旨以總兵卽用紀事

總領綸音下紫閣追亡逐北憶高墩書因讀久纔生智甲爲披多也半
溫背擁螳螂徒自侈胸無雲夢已全吞少陵舊有擒王句笑拂吳刀萬
馬屯

鐵蓋山生擒首逆張格爾召見後以提督銜在乾清門侍衛上行走恭
紀

一片承平奏凱旋公然生入玉門關提封萬里通沙漠神澤重霑靖觸
蠻徒慕武鄉巾扇暇空懷羊祜帶裘閒逶迤學步公卿後揖讓從今洗
舊顏

赴固原提督任

秋容淡掃景澄鮮恰遇槐花八月天回首此心依北闕計程何日近西
川馬行楓葉蘆花送路指秦關渭水旋一曲涼州歌未了豪情叱馭仰
前賢

重遊東湖謁東坡先生遺像

策馬城東趁曉遊頑岡濁水望中收乍無乍有山光藹旋合旋開樹色
稠楊柳風微清似夜梧桐月冷淡於秋一湖好景芙蓉占綠到長橋接
小樓

戴錫疇

字壽田

長壽縣志

卷十五 文徵下

一一

贈采薇僧

滄海橫流淹九土誰似先生志復古先生強硬古豪傑骨幹肯爲流俗
滅先生道德有夙根忠臣孝子旌其門心鄙俗學末學不足道遙從許
鄭淵淵源有時著書五千卷有時下筆一萬言六經雖蹟宗派夥俱歸
先生舌底作瀾翻先生治經不談詩談言偶及乃其餘憶昔名場馳逐
兩榜俱魁秋桂春花沿路采聯步高登市駿臺一麾出守古東越心頭
朗映珠江月外交內治俱秩如製錦才猷直煥發那識時變政翻新學
堂改建紛如鱗先生逆知孔孟薪傳將墜地裂冠毀冕此其因抱住家
塾黨庠舊例堅如石雷霆雖震氣常振此吏強項強不折九重乃以違
章謫一從言偃去武城比戶絃歌漸非昔感懷時勢志澄清遠隨星使
渡東瀛眼擴扶桑一輪日博采新猷佐聖明人事乃隨天時變歸來楚
蜀皆發難上書曾識小臣忠揭竿難禁天下亂瞥眼滄桑變態多欲挽

狂瀾喚奈何惟有掛冠歸栗里閉門權當安樂窠畢究淵明未忘晉時
藉詩歌竊忠蓋卽將楸墓作桃源君親未報悲秋鬢猶復諄諄喻後昆
惟恐忠孝兒未聞若者繼志宜謹若者服官宜勤其間言盡意難盡無
非勉以竭力事父委身事君本來興觀是詩旨况復箴言談論理一唱
百和儘多人從此頑懦皆興起人心敗壞世風淪先生乃是扶持名教
綱常一偉人

李文山

三忠祠

雷將軍面南將軍指睢陽城上張公齒不斬賀蘭頭此心終不死

任應階

字星三

看山

微矇蒼翠鎖松關佳氣天空自往還指點重崖高下處一層雲隔一層

長壽縣志

卷十五 文徵下

一一一

山

李端然

字午亭

成都武侯祠題壁

三國議紛紛丞相得真主史傳載偏安終非定論語我生千載後攜尊
獨弔古不見漢家人猶見漢家土翁仲寂無言空山啼杜宇

楊德坤

字子靜

書謝孝子萬程事

康熙某年七月二十日孝子謝萬程鬻妻葬父營窀窆其妻李氏行且
哭自陳妾爲詩禮族無計葬翁忍羞辱願君完我節子孫蒙其福王全
捐金方置妾惻然感動不相瀆昔年有子出被劫爲人牧養旋獲復阿
兄故與弟積忤誣爲逃人具訟牘循吏卓卓張三異奉檄行察按其獄
是親生婦節無污馳召故夫認還故婦古有傭身以葬親今汝所行尤

難遇節孝雙奇特旌閭張公大書某年月孝子謝萬程夫妻復完聚
書吳孝義鴻錫事

程嬰杵臼善撫孤吳君行誼世更無受恩稱伯不稱父父一而已焉可
誣七歲兒童能辨此大義絕勝名師儒從兄詣京勸歸去感恩圖報未
忍俱噶公老矣諸孤幼願竭智力相持扶丐求故交通仕籍歸門五日
如申胥首輔驚呼相擢用世有義烈如斯徒聖祖親征厄魯特公子扈
蹕彎弧歸來偶爾陳博具吳君大叫驅樗蒲佐順振饑行實惠十萬
民衆驩聲呼次子和藹方誦讀君述先德當勤劬涕泗督課猶懼怠穴
椅貫繩自係拘高掇巍科繫誰力世人那容笑其愚和麟効力永定河
君持畚揭成長堤泣顛河神功不壞于公嘆息錫以禱卽今受室念父
母得遺衣冠葬之墟設奠招魂營邱墓徘徊終夕臨歲除生我養我義
兼盡受恩報恩道同符喪君如喪慈父母三子哀泣死復蘇男去瓔珞

長壽縣志

卷十五 文徵下

一三

女撤飾道旁聞者長歎歎我爲吳君歌此曲亞亞枝上啼慈鳥

懷古

古人先鳥起澄懷無一事爽氣從西來開軒治真趣丹桂暮秋露桐葉
滿堦砌坐覽名臣傳曠世幾相遇懷古發長吟藉以拓胸次願與素心
人脫然澹塵慮

古人慎守身不臨高深境胡爲洪濤中帆檣馳雲影來者爲名驅往者
爲利騁名利苦拘牽風波生俄頃平地山水佳塵世無人省

古人於處事盈虛常究宜滄海變桑田天道自轉旋雄鷄不鳴殺樗櫟
不材全樞機慎所發影響無不然知雄守其雌勿爲禍福先

成都紀詠

劍閣橫雲歷大荒西南壤接控戎羌羣雄割據誰眞主正統偏安有漢
皇纔笑井蛙乘玉輦徒教野兔上金牀興亡千古成何事東去江聲日

夜長

金陵懷古

六朝金粉黯然銷堤上鶯飛柳萬條天塹休誇難徑渡金川門外馬蹄
驕

鄴城懷古

橫槊當歌一世雄曾聞合座誦周公分香賣履人何在都付銅臺瓦礫
中

張良

假託神仙任去留穀城山下白雲秋淮陰亦是韓王裔曷不遣書勸遠
遊

李滋然 別號采薇僧

輓潮州鎮張軍門

長壽縣志

卷十五 文徵下

一四

三忠大節可同論五嶺誰留廟貌尊義憤千秋填粵海丹心一片接雁
門呼天獨矢狼皮願報國空餘馬革存清祚未移身竟死韓山祠外恫
招魂

一代英雄付逝波心傷故國恨蹉跎元戎誓死操戈晚疆吏無謀降敵
多熱血長埋新草芥游魂空傍舊山河炎荒冷月今猶昔夜夜蒼涼照
五坡

楊州梅花嶺展史閣部墓

滿江春水綠法法嶺繞梅花日又曛桂省方期扶永曆蕪湖早已縛降
君淮南祠宇空秋草浦北關山隔暮雲我亦傷心悲往事空餘血淚灑
孤墳

過漢陽

紅羊劫換幾經年晚景蕭疏欲問天兩岸烟花遷客夢一帆風雨旅人

船雲山浩渺渾如昨城郭依稀已異前黃鶴樓中聲寂寂還留冷月照晴川

晚泊夔門

窮途飄泊寄扁舟風雨漫天感舊游百喟茫茫惟旅夜一年草草又新秋河山無恙人非舊歲月難迴水自流白帝城邊餘落日不堪重話蜀

江頭

輓袁世凱

奸謀未遂骨先寒五載徒勞說闔干顧命方期倖葛相辜恩無術學曹瞞册年兔狡空營窟一代梟雄此蓋棺地下若逢欽顯后欺心何必諫

迴鑾

詠李貞烈女

李貞烈女事名人題詠甚多選載於下烈女另有傳

段壽慈

字峨僧

長壽縣志

卷十五文徵下

一五

夷齊未仕紂召忽不仕桓後世功名輩忠孝誰兩完寡姜詠柏舟共姜詠柏舟讀書能學古大節光千秋君不見長樂老人事五主藉口伊呂笑巢許丈夫高行自古難吁嗟乎李貞女

殷成恪

字肅齋

兒無父母無夫單鵠寡鶴聲悲呼一解少小讀內則長字關西楊早聞

離卣語遲詠關雎章一朝凶耗至氣結聲不揚上堂辭父母入室拜姑

孀弟有子兄未亡類我類我呱呱泣繞懷索乳心傍徨二解翁已歿姑

寡懽父薄宦母憂煎代郎供子職一心兩地牽不惜蕙蘭苦繞庭慈竹

影團圓三解兒生不辰兒命難育兒母何依兒父誰續孤墳宿艸荒若

敖鬼夜哭四解母曰嗟女命何獨差父曰無苦女名足千古但不知寡

女之絲黃鵠撲茫茫此恨何時補五解姑曰歸寧女心怛怛歸侍母病

淚睫熒熒柔腸九折佛號千聲而竟不靈女何以生六解壬辰之歲秋

八月蒿里之歌何凄切母兮母兮臨其穴悲風四起雲無色呼天天不
鷹觸棺棺欲裂道旁萬淚一齊下卓哉誰及女貞烈七解冥然絕粒容

無哀奄奄一息歸泉臺阿母相逢握手笑謂若婿若兒相待已久矣而

汝何遲來八解峨峨鳳城湯湯江水玉骨同埋城西十里烏宿鴛鴦枝

交連理開貞女花此蟠根李九解

郭用楫字蜀良

枳里鄉懷清台秦皇封築何崔巍下有龍溪鳳嶺毓奇氣崛起巾幗丈
夫才只怪蒼天竟無憐才意乃令仙李玉骨埋塵埃楊家婦李氏女婚
禮將成女字已許未御鸞絃先失鳳侶兩行珠淚沾衣裳一聲哀號驚
風雨不願秦樓吹玉簫但願撫孤如嬰杵可憐女宗貞孝本天生乃祖
精忠繩其武慈幃病母延呼吸萱堂上侍有威姑承歡歸寧兩無嗚呱
呱待哺螟蛉孤不辭勞勩心力瘁事畜未惜孱孱軀震川箸論嫌其膚
未嫁夫亡豈爲愚季布一諾千金重從一而終禮非誣吁嗟乎夫死兒
可撫兒沒身無主拚將一命報先夫女貞摧折風霜苦生不同室死同
穴長瘞夫家一抔土至今行人過墓前怕聽垂楊月夜哭杜宇

楊樹棻字宜政

柏舟天志古稱賢况是夫亡未嫁前妾願守貞盟皎日姑如有子慰衰
年枕孤夢早憐鴛鴦冷海闊魂應化鳥填地下逢郎同拜母一堆血淚灑
黃泉

黔江回憶盡忠時節烈淵源信有之弱質竟能繩祖武貞心何止式鍾
儀拚燒土作鴛鴦瓦苦耐霜摧蛺蝶枝欲死不堪生不可一絲殘命繫

孤兒

那堪厄運到螟蛉自分從夫葬九冥回首尙憐萱已老沉疴頓痛藥無
靈衣搜舊篋衫痕素魂返空庭燭影青月裏嫦娥應有恨年年此夜照

疎櫛就義捐軀竟不難夫魂有伴母魂安百年愁緒憑心貯廿七年華
付指彈清白風高人再起忠貞節苦女能完巴江寡婦臺猶在他日旌
閭共木刊

戴錫疇

字壽田

離鸞譜罷正凄其况復靈萱又折枝夫債未完兒早死娘身已去女堪
知一生白玉無瑕質三尺紅羅絕命辭囑咐殮衣皆縞素此情此景愁
人悲

能將一死報夫難兒女情懷俠士肝餘地並無孤可託癡心只有淚空
彈媧皇補後天終缺趙使歸來璧幸完一樹女貞青不改墓門淒絕雨
風寒

周鈞

字雲石

閨中殉義肯身輕廿七年華了此生未老已同薑桂辣先凋猶是柏松

長壽縣志

卷十五文徵下

一七

貞三更碧血哭兒淚一縷新魂傍堦堊從此青陵變化蝶滿山草木享
芳名

正氣長留畫閣中人稱兒女竟英雄託孤恨未酬夫願就義真能繼祖
風天遣蛾眉扶大節土燒鴛瓦訴幽衷千秋粉黛知多少如此清標幾
箇同

駱成驥

字公驢資州人狀元

蜀魂夜叫山竹裂千里颯颯飛秋血生死鴛鴦兩愁絕愁入斑竹淚不
滅松筠柏幹爭奇節渝州貞女何豐茸顏色自負桃花紅骨重神寒剪
雙瞳昨朝垂翅附冥鴻不意蹭蹬隨秋蓬阿爺寄書何朦朧笑作楊字
漫書空自倚忠孝傳家風荆布入門拜姑翁姒續妣祖一綫中新人出
壙精靈通相思木帖金鸞訊犀珍銀夜不須鎮紅顏未老心已灰一夕
白髮滿秋鬢吾聞顧母亦撫孤亭林琅琅成巨儒貞女生小儒家子荻

灰一畫夫不死吁嗟乎慷慨易從容難臣忠婦節一例觀趙璧璀璨相
如完婢妾咸慨徒悲酸服儒服冠儒冠輩幾人聞之應膽寒
徐正儒

題周雲谷墓

濂溪門館甚清幽如我曾經幾度遊立馬尙看華屋在隻雞難向故人
謀夕陽古道雲千里流水空山土一邱想像魂歸明月夜松風吹過水
西頭

題何均成墓

英姿卓犖出塵寰一笑春風滿座歡可惜文章埋地下空留迹韻在人
間揮毫怕作傷心語掃石難禁滴淚斑寂寂青山詩骨健杜鵑聲裏夕
陽殷

周本一字伯貞

長壽縣志

卷十五 文徵下

進士題名碑歌

在京師國子監衙門內

西山片石高嵯峨苔青字白標巍科試看當日詞林輩石爛名存能幾
何

苦旱

到處禱甘霖逾時望益深風塵徒眯目天地亦何心草野無青色槐廳
尙綠陰會當民解愠一曲撫瑤琴

彭光遠

字鳳和

夔州弔鮑忠壯超

蓋世英名弱冠年劍光驚起蟄龍眠六朝唾手收殘局百戰雄心補破
天緩帶生慚羊叔子明珠死誤馬文淵曾侯既沒無知己老去兔裘祇
墓田

武昌訪黃鶴樓故址

天公偏遣我遲來手把梅花認劫灰玉笛難吹仙鶴夢芳洲空憶賦鸚
才武昌城繞江如帶庾亮樓邀月滿杯當路忌名真可笑不容寡婦築

清臺

聞鄂省有一寡婦家數百萬欲重修黃鶴樓士大夫恐其擅名也不許

連夜夢與雷培生論文

戀戀故人情論文四座驚名心猶未死辯口竟如生鄉夢縈千里天才
驚九京思君身後事蕭瑟庾蘭成

塾江懷李西漚先生

英才大半出公門鹿洞鵝湖道範尊
拙把文章消歲月羞將俎豆仗兒
孫性情孤介甘投老時勢艱難怕感恩
諫草既焚詩卷在至今啼鳥愴吟魂

梁山懷破山和尚

曾將文字結因緣俗氣消時卽是禪
多少才人誇慧業昇天成佛讓君

長壽縣志

卷十五 文徵下

一九

先

瞿唐峽

灑灑如馬復如象咫尺瞿唐不敢上大船
桅拆逐風狂小船篷飛驚魄喪休言難過
是夔關人鬼關頭在此間電掣雷轟蟄
龍起滿江波浪欲吞山倒瀉銀河灌峽
口峽深無底懸崖陡個個眼花耳忽聾
水中百萬貔貅吼直向蛟宮血戰來滿
船顏色如死灰我生不作中流柱試問
狂瀾孰挽回過後洪濤猶駭目微軀險
葬江魚腹正當浪打入艙時懺悔聲聲
忙念佛如此風波冒險行可憐人命鴻
毛輕那知更有人心險平地風波頃刻
生

金山

金山俯矚水晶宮七級浮圖四面風我
欲停舟窮勝迹妙高臺上月玲瓏

焦山

鎮住維揚水底天千秋瘞鶴一銘傳焦光訛字何須辨隱士出來卽地仙

陶然亭

眼界忽玲瓏西山夕照紅詩情酣酒後仙境闢塵中葦漾千層浪窗開四面風綠槐鄰寺好龍爪怒凌空

張葆彬字均甫

甲午感事

燕領難邀萬里侯一枰敗局仗誰收河山莽莽新亭淚冠帶紛紛築室謀將士蟲沙長飲血相公蟋蟀自吟秋朝鮮蓂貢無消息儔記東明是國讎原注東明卽倭國

鄧宗藩字伯垣

長壽縣志

卷十五文徵下

一一〇

送張學愈歸璧山

通川一水逐飄蓬半浦斜陽落照中別緒萬條車與笠客程三月雨和風關山脈脈情無限燈火年年夢未終預訂聯床風雨約錦官城內草堂東

小憩呂氏園

簾幕搖新綠軒牕爭俗塵風來花弄影日煖室生春入座琴書潤登堂草木新紅桃三百樹彷彿武陵津

次舒和軒韻兼懷舍姪春農北京

新詩獨唱大家風欲和還慚句未工老去生涯如病鶴翱翔天外有孤鴻燕山蜀水難爲別虎門龍爭局已空日望鄉書久不至倚門時待故人通

登城晚眺

結伴登臨感素秋無邊景色豁雙眸斜陽片石明羊角

堡名在大江岸

日落清江

戀虎頭

城南有山名白虎頭

鴉影亂翻紅樹浦雁聲遙渡白蘋洲回頭又見關山月

笳鼓喧喧起暮愁

和趙芸蓀大令乙卯感懷原韻

官鼓無聲煖閣開撫時猶賸劫餘灰幾人談虎情猶悻徧野嗷鴻事可哀獨立祇為遺世語安危還仗使君才茫茫天道知何似坐對斜陽一舉杯

鄧屏藩

字仲述

和趙大令感懷

羊胃羊頭盡作官不慚名器玷衣冠憂時志士方招隱徧地流民未忍看大廈棟梁基已圯中霄風雨夢難安前途世變知何極翹首還從壁上觀

長壽縣志

卷十五文徵下

一一

悔不當初學壯遊半生作嫁此淹留功名未遂人先老日月無多歲已流故國遺民餘舊憾他鄉薄宦動羈愁歸田漫說莼鱸美正是江南八月秋

李鍾璜

字渭侯

辛亥書懷寄元甫弟光乾

未能絕域建奇功顧盼空成矍鑠翁士到窮途瞻氣節天留殘局困英雄囊金結客風情在運甓忘勞感憤同欲訪虬髯三島去崢嶸朝氣一帆東

山川跋涉幾星霜每到無聊輒舉觴胸有奇憂成措大生逢濁世託佯狂能容厚謗心無忤漫說多愁氣不揚對酒歌餘還睡去南牕孤枕夢義皇

大夢方酣何日醒一聲鞞鼓暗心驚可憐朋舊音書斷且盼男兒事業

成半壁河山頻灑淚滿朝文武怕談兵老人夜半觀星象碧漢雲埋北
斗橫

苔岑契合兩無痕花滿春城酒滿尊
濁俗泥塗傲軒冕照人肝胆薄昆
崙輸君筮仕三吳遠笑我棲遲一
劍存差喜桐江風月美客星巖
隱未堪論

奉簡采薇僧夫子三十二韻

泣望山河改顛連已六春生涯自蕭瑟國步嘆遄迫歲歉呼庚癸星昏
失建寅懷忠心似鐵閱世鬢如銀薇蕨甘饑餒馨香薦苦辛年年佩萱
草念念哭靈椿風木終天慟烽烟匝地屯幾遭朝士笑但與野人親此
日山中衲當年席上珍遊蹤曾萬里灑氣接三辰世變休觀豹道窮嗟
獲麟驚心羅自冒雪淚絕紅塵彭澤仍思晉桃源却避秦忠貞銘譽譽
譽不畏申申慷慨追先烈艱難剩此身天原能祐善友竟不憐貧夢寐

長壽縣志

卷十五 文徵下

一一一

依雙塚綱常重萬鈞捉矜原憲肘脫帽管寧巾震撼驚風雨撝呵仗鬼
神毛生悲捧檄張翰祇思蒹薄宦追前事安禪證夙因文章箴後進矩
矱式先民頓覺賓朋少慚爲乞索頻冠裳威敵屣風雅賴扶輪恫絕歐
風熾何堪孔教淪酬恩朱厲附善相九方湮遠樹悲黃鳥孤衷戀紫宸
離羣羞燕雀避世獨松筠滿腹新亭泪空山故國燐師惟知勁草我媿
說傳薪公議留鄉校平衡待史臣他時談軼事佳話滿城闈

右詩原作祇三十二韻得之遺篋其刻入採薇僧集者爲百韻知由僧

賡續成者過半也 鼎禧謹識

郭榮炎 字漢臣

青烟洞

峭削懸崖露石根千尋瀑布水聲喧青烟噴起龍蛇蟄雪浪翻騰日月
昏古廟凌空嵌絕壁怒濤直下撼孤村侯封潤澤留三字隱隱雲開兩

扇門

題天寶寺壽佛閣寺在涪陵

大雄宮殿鬱蔥蒼高閣風聲出上方卓錫僧歸雲補衲談經人去月盈
牀江山四壁開蓮社烟樹叢林占草堂三百年來餘勝迹登臨不用感
滄桑

華宗智字雨岑

贈采薇僧

靠水依瑩負郭城除翦荆棘舍成精門無捷徑空狼走遊向深山伴鹿
行蝸角乾坤容故國壺天風雨濯塵纓關情最是離離黍如醉中心不
為醑

碩果孤存一瓣香貪糟飽去餓陳忙避人世外空凡境採藥雲中和蕨
嘗山為夷齊生色相鐵教仙佛鑄心腸五千年後超塵想古道芳留日

長壽縣志

卷十五文徵下

一一三

月長

傅維乾字子健

懷韓鏡如先生

傲骨天生迥不同至今猶想古人風言辭謇諤汲長孺詞賦宏深左太
冲桐木家聲堪繼續荆州雅望本淹通寶興管領勞鞅掌月旦評成有
至公

懷採薇僧

心如朗月映清潭香火詩情在一龕兩袖清風符趙抃十年善政比張
堪頭銜迹似陶彭澤心史吟成鄭所南祝髮不愁身世苦西山薇蕨有
餘甘

懷左蘭皋益三

家法淵源溯太冲經師人表樹高風滿門桃李春雲暖都在先生杖履

中

李鼎禧字峙青

夜宿鳳山書院

門牆函丈故依然記擁皋比已十年

甲辰設師範講習所於此余主講席

不見當時舊桃李濛

濛曉雨一溪煙下即桃花溪

送華宗智庶常入京

中朝庶政待平章好樹奇勳紀太常豈必閉門皆子柳不妨聞道讓庚

桑一帆風雨遲行客萬里關山帶夕陽君向廟堂我田野人間那計有

炎涼

弱冠文章伯仲聞盧前王後總歡顏

自辛卯入庠五次歲科試皆余第一君第二

君才漫擬陳同甫

我志翻如庾子山散木自難逢匠石衰朝或恐累清班科名肯作雲泥

論浩氣天空相往還

長壽縣志

卷十五文徵下

二四

彭鳳和招飲北真觀

鳳城此高絕把酒一登臨入院了無俗禪房雲氣深煙霞曾郁郁桃李

自陰陰何日問丹訣豈無避世心

雉堞偶登望午晴開野煙螺旋石上雨蕉裂牕外天我意抑何遠徐翁

早化仙江山餘勝跡風景却依然

雷調鼎字輯廷文生

輓經節婦

曠世遺才無蔡邕焦尾終遺爨下桐明廷久乏輜軒使潛德幽光誰與

記我從昨夜聞君言坤維正氣筆底翻冰雪心肝難覩縷聊憑崖路弔

貞魂雷氏女經家婦十餘妙齡奉箕帚和如鸞鳳敬如賓甘苦與共期

白首簫聲倏忽斷秦樓百年恩愛一時休幾回痛煞甘身殉鴛鴦雙死

死復留脂粉飄殘花釧委共姜從此誓柏舟當矢所天年十九司馬琴

聲時所有爭奈古井無翻瀾不似文君終失守唯念堂上有衰親繞膝
又乏石麒麟養親育子丈夫志夫死責在未亡人視螟蛉掌上珍敢將
辛勤希畫荻但願負荷慰析薪茫茫天意尙可知中宵婺煥光陸離五
十年來貞苦節昔者藜藿今蘭芝自是青鳥頻催蟠桃熟前星有耀墜
瑤池噫吁嘻趙家節婦留孔壁千載巍然露筋祠陶母人中傑班氏漢
宮師如此清操不傳述巾幗孰肯勝鬚眉

劉焜

時年八十有五

祝雷堯平八句有二壽

三元毓秀孕菁英世德相承應運生接踵疊宮子繼父比肩庠序弟隨
兄兩株丹桂清香溢獨立靈椿老氣橫自是吉人天必相華堂朗耀映
長庚

是翁矍鑠好精神五福箕疇備一身望重杖朝符梁灝經傳家學繼蘇

長壽縣志

卷十五

文徵下

一五

洵閒翻貝葉社塵累日涉逸園養性真作頌壽君兼壽我他時同享百
年春

按堯平居三元塞因子文溪明初父子三人皆庠生逸園其家園也

余少

字浩然貢生

御封山弔雪菴和尚

御封山頂植松柏老幹蒼枝映廟宅徐行緩步見墳邱殘碑沒字苔蘚
碧上有石塔壓佳城參天倒影數千尺植杖藉問瘞者誰雪菴和尚留
古跡明季有君號建文郭公扈蹕避兵氛孱王返轡臣僧死後代誣傳
太子墳建廟經營仰杜公剩有名碑氣吐虹梵響敲團朝露白鐘聲驚
落晚霞紅內存雪菴圖一幅一回展視一回哭不畫紫袍畫緇衣瞑目
參禪一老禿至今屈指三百年墓木拱成蟻蟻屋我來勝地讀離騷對
佛焚香虔心祝不願忠魂何所歸惟願忠魂歸天竺

王百原字性之

次督學何子貞猴背翁七古原韻

昔李廣猴背善射子貞試渝州取以命題作詩一首屬同人之誼自况其善書也百原詩亦遇其選

翁之書法孰與同行氣如虹神如空醉後偶持生花管超以象外得環中當其揮毫得意時篆分隸楷均玲瓏雖云智巧本天授半由平日精進功翰苑名公鉅卿輩一齊俯首歎技窮搥胸畫掌苦臨摹分布變化總難工矧值掄才校士日以法示人法本公恨予作字多任筆肖形科斗與魚蟲祇緣淺見粗疏故體不分明養不充今乃復覩鍾王格渺小愈形跼踖躬縱使後塵難學步得識一面也英雄不須爭封萬戶侯何必能挽五石弓美酒一杯書一幅名傳矍鑠哉是翁

霍雨霖

字潤生山西沁水人官邑宰著有藤蔭軒詩草

題任香湄廣文嘯聲樓詩集

一卷古冰雪儵然絕點塵寓言原八九好句出清新落落誰知已寥寥

長壽縣志

卷十五文徵下

一一六

少替人眉山曾濟美鍾毓又涪岷

誰與彈此調來肯謁吾徒閱世詩能壽同人德不孤精神看矍鑠筆硯愧荒蕪敢說絃歌治輪憲大雅扶

留別縣中諸友

巍然室重魯靈光白髮蕭蕭坐講堂與世尙能維古道生兒喜可繼書

香盈門桃李成陰早入室芝蘭引臭長

公送蘭數十本

杖履追隨經十載鹿鳴重

宴待稱觴周伯泉山長

聲華珂里久稱賢局務匡襄近卅年理解圓通和事易精神老健得天全飲醇真比周公瑾排難誰如魯仲連叔姪弟兄名藉甚行看科第慶

蟬聯

周子岑刺史

與仲同科正少年

已未科同兄資生一榜

一時佳話徧東川文名久已欽張鷟祿養

無煇効鄭虔

選冕寧教諭二次不就

薰德競傳鄉里善遺經喜得子孫賢政成端藉

匡襄力友事如君願執鞭張子泉大令

文場酣戰仰英姿又是春明北上時似水流年驚我老登天科第惜君遲知交早結苔岑契經學洵稱梓里師咄咄書空緣底事探花會到鳳

凰池殷月琴孝廉

貢樹分香憶茶宸酉科三世羨傳薪父子皆選拔文章憎達能安命溫飽無求

豈諱貧鮑叔多金原諒友鄰生入幕尚依人子戟門東甫皆就慕承先啓後傳佳話

行見威祥顯鳳麟雷濤生選拔

百里分符愧一官春明饑我憶春殘未終祿養歸來早藉甚文名獲雋難公事無多資友事治安乏策幸民安民生國計需籌畫好展宏才繼

一韓謂樹屏侍郎傳熙之主政

登天一第古原難八品頭銜註冷官祿養未能酬束皙里居何事臥袁安春風香引芝蘭室秋雨肥羞苜蓿盤好藉經師端士習青青莫守一

長壽縣志

卷十五文徵下

氈寒雷慎初廣文

克紹家聲中一科少年豪氣未銷磨執經也肯隨盧植抱璞何須泣下和眷戀庭闈願養早艱難國步薦才多萬言好試彤廷策莫負光陰老

薜蘿李霞村孝廉

矍鑠精神近八旬功名舊已貢成均友于誼篤今昆季獨行風高古逸民勵俗有人能折節讀書喜子可傳薪角弓頻見駢駢友我為旌閭諷

薜紳何映泉上舍

素封家世著巴東公望居然萬石同願養能承慈父志淡交頗有古人風三鱣預兆占楊震令姪子雲選丹稜廣文一鷗行看薦孔融予也多財吾為宰噉

噉中澤徧哀鴻舒文光二尹

任應沅字香涓

種花

要從香海覓生涯鋤慣春畦路幾又十二闌干都植徧中間大半是梅花

靜意

輕寒一枕醉梨花為蝶為周夢易差小坐焚香無一事半窗蕉雨誦南華

遊東山寺

寺踞山頂林巒秀異佛像莊嚴為邑中勝境寺側有白馬墳寶珠一顆藏佛殿脊欲皆明代高僧靈跡

靈跡問仙鄉岩嶠稱上方雲封神馬墓月淡珠寶光佛有蕭梁意人間貝葉香山僧知姓字不敢笑詩狂

禪悅

脚跟實地只塵埃妙諦原從妙悟開色相空時翻近幻現身說法是如來

達摩面壁圖

長壽縣志

卷十五文徵下

二八

戒律何從淨六塵儘將跌坐駐元神達摩艱苦曹溪慧都是禪門證道人

丹青一幅現奇觀後學津梁耐細看要識神通能渡海請君堅守破蒲團

團

看人畫佛

畫工畫意不尋常七寶莊嚴會梵王淡處過於濃處好總從頂上現圓光

春日讀梵書

新詩頻寫兔毫尖一字何曾抵一縑自媿今生無福慧百花香處誦楞嚴

登菩提山

平生具有看山癖夢裏煙霞近咫尺峯巒未便愚公移着慣阮家新舊

展我今載酒登菩提秀拔蒼巖無與齊呼吸定然通帝座飛仙可挾天
能梯曾聞蜀西有雲棧窮高極險多奇幻又聞巫山十二峯排空森豎
玉芙蓉九疑泰華諸山亦神異相較都應失位次未攜謝眺警人詩嘔
出心肝無一字似聞神鬼呵叱聲何不落想莽莽浩浩種豪情我思混
沌初開候媧皇鍊石補天漏大造鑪錘綽有餘賸此嶮巖聳太虛不然
終是巨靈擲四頂依稀仙掌跡想當石破天驚時雨逗秋空電鞭赤一
段遐思寄典墳毫端自覺走風雲吟成想入非非際願窺長吉玉樓文
遊徧崎嶇不知止萬丈晴嵐蒸足底笑謝山林踏月還置身猶在霄漢
間大叫前時五嶽皆虛語從此歸來不看山

懷清台

我訪懷清台台基并堙沒三徑白雲封嶙峋森石骨一段蒼山列畫屏
遺蹤猶記傍沙汀叫盡子規魂不返祇今松柏爲誰青

長壽縣志

卷十五文徵下

二九

白頭灘懷古

灘聲一角蒸斷雲敗衲當年過此曾佛法有情憐少帝空門無術制妖
僧皇圖歲月歸羈旅塵海波濤感廢興太息神龍具鱗爪江湖曆盡不
飛騰

輓韓淥琴大令

邑優貢官福建浦城縣知縣全家殉難奉旨旌祀

清風伯仲古名流素志終將一劍酬到此那應還栗里從前容易識荆
州閩疆續著神君頌巴峽魂歸月夜愁畢竟恩綸褒烈士祠堂高築鳳
城秋

輓李魯生廣文

邑舉人官黔江教諭殉粵匪難旌卹有加

自拚瀝血訴忠肝苜蓿無端誤冷官慷慨捐生求士易從容就義得公
難文章飽孕千秋史盤錯眞成九轉丹不向蓋棺求定論生前已作古
人看

趙維城

字芸蓀江蘇武進人兩任長言知事

感懷雜詠

滄海橫流變局開壯年心事已全灰連天烽火驚相避滿地瘡痍劇可哀沒齒已成終古恨此身都爲感情來私心猶冀回天怒劫後餘生亦痛哉

誤盡平生是一官中華已改舊衣冠慈宮詔令傷心讀故國河山淚眼看忍負先朝恩義重幸離宦海夢魂安他時容享共和福遺老深山跂足觀

劫來重到樂溫遊琴鶴隨身宦轍留惹以蒙譏悲亦伏簡書嫁禍到清流瘴烟掃盡憐民困妖霧方興令我愁盜弄潢池能幾日霜摧亂草不禁秋

養寇先爲大府憂虎皮狐假逞奸謀危城鼓角三更壯幾輩妖魔一網

長壽縣志

卷十五文徵下

三〇

收屈子工愁餘涕淚曼卿早逝失朋儔原知世事都成夢料理歸裝屢乞休

故交相愛復相親舊治重來有夙因差幸池魚殃未及早知社虎禍成真若論大節身應殉爲痛斯民淚灑頻膺有楹書容補讀最難天許作閒人

周永緒

拜將

聲靈赫濯足安邦眞主能將意氣降天降英雄才第一人推國士遇無雙六軍翹首瞻韜略萬衆傾心擁戟幢爵授齊王曾列土勳名蓋世指

烏江

李培業

壬子感懷

身世頻年感慨多
韶華卅九付蹉跎
匣中劍老鋒仍利
塞上人歸鬢欲
皤
道不猶龍休問世
功因恥狗且投戈
王郎有興何時起
攜手中原意
若何

余濤

字松徠黃葛鄉人文生

白蓮

冰饑玉骨抱仙胎
脫盡繁華據上台
莫怪花心清不染
西湖看過六朝
來

余書

字同文黃葛鄉人

桃花洞

行來何處覓春華
小洞無人且駐車
錦水未勻三月浪
仙桃爭放六朝
花
壺中舊雨還今雨
灘外朝霞又晚霞
此去武陵應不遠
漁郎曾否問
津涯

長壽縣志

卷十五 文獻下

三一

顧光烈

字少豐黃葛鄉人文生

顧影

我自平行汝倒行
行行問步步總相爭
回頭一笑休輕逼
不有吾身那有
應
自到人間倩爾陪
相憐相顧兩無猜
知君不斷投昏暗
只向光明地上
來

黃鑄

字東僑海棠鄉土橋人

偕三弟及諸子登鍾成寨絕頂

四面雲山堆地起
疊疊重重環而峙
直豎橫斜三十里
下則深溝上高
壘
其中竹木薪炭無
不美良田數百石
沃土數千坻何論
奇峯奇石并
奇水鍾成此處天
有以千峯誰與比
憶昔丙辰嘉慶年
跳梁狐狗震東
川大城小鎮傾無
數惟有此山獨見
全億萬生靈歸衽
席長墊鄰涪樂

朝夕豈果賊人不我屠地利天時俱受益吾家祖父曾寄居歸來時自
說當初迄今四十餘年矣耳聞心想每歎歎倘得同人共登眺一遂遊
心一憑弔男兒尚且重橫行何況天生此峻峭今年癸卯八月秋采藥
採花興忽過攜鋤著屐更攜酒一路追尋到上頭有弟有兒人幾個烟
霧踏碎雲爲破古關古卡尚依然到來始信此山大東望鶴坪口可吞
書巖西輔屬籬垣高梁五華近南北羅列都同兒與孫福地洞天兩爭
勝雲影烟光更乘興突地樵歌起林中唱徹太平聲入聽君不見龍穴
兮虎有嶋從古人無不預圖心懷久欲尋皋島豈甘平地立斯須

張玉成

字炳輝舉人

美人抱琵琶圖

默默有所思琵琶手上時含笑欲何語相顧總情癡問爾來何方青琳
翠水旁祇因小謫塵寰住影落人間難盡藏一朝繪出娟娟影遂教長
留一瓣香妝成妒嬋娟雲鬢貼花鈿五銖三兩舞翩翩慵將幽怨託朱
絃不作潯陽嘈切鳴不爲明妃出塞聲

陳一之

字扶風興隆鄉廩生

杜鵑詞

別離何事費叮嚀啼徹長亭又短亭記得去年三月半鞭絲帽影客中
聽

鴟

柳絮清明黯五湖頻頻愁緒感征途現身若問三生事爾定江南話鷓
鴟
蜀江千載恨難消楮葉深深肯寂寥一事至今人抱恨不應飛過夕陽
橋

人

明月山頭幾度春乳雛猶自識君臣聲聲叫去歸何處故國蠶叢讓過

底事東皇爲欲馳蹄痕和雨滿花枝春來春去渾如此嘔盡心頭血爲誰

雲滿晴橋水滿汀叫回芳草色青青爾堪珍重曾知否拜倒詩人杜少陵

江天漠漠夕陽斜一路空山宿落花燕子莫嗤蹤跡苦渠無門戶傍人家

轍夜春雲暗碧蕪園林竹徑聽模糊一窗風雨一窗月知道春闈有夢無

掠影翩翩過翠微枝頭蜀客認依稀等閒莫便修成鶴尙有行人勸未歸

雷漢賓

文生

春柳

長壽縣志

卷十五 文徵下

三三三

小桃開後燕飛時萬緒千條不自持客舍青垂知己眼妝台綠展美人眉清明旅店江南路寒食東風馬上詩最是漢宮占勝景三眠三起總相宜

段壽慈

清明日念先慈殯宮不得祭掃詩以誌痛

黯淡青陽氣不舒清明又過杏花初未陳一盞綠羈旅定識重泉尙倚閭負土幾時營塚免悲風終古痛皋魚買山待築思親舍晨夕依依報割裾

向名顯

字帛書

和采薇僧

鼎湖雲暗闕尋空嘆息河山瓦解同冠蓋叢中無淨土松楸影裏有孤忠爲承累代君恩重長作清流臣志終一著黃冠千古恨那堪回首話

瀨東

羣龍无首地天昏何似浮圖淨六根箕子雖奴股有色淵明未死晉猶存自傷野鶴眠松牖長作冥鴻守墓門異日枳鄉修志乘獨行公應首居尊

鄧宗藩

題邑宰霍潤生藤蔭軒詩草

共頌神明宰詩名滿蜀東寓言同莊叟雅化繼文翁未假推敲力都歸造化中十年時問字廣廈庇無窮

風騷歸懲勸無事鬪清新老嫗詩能解先生筆有神鳴琴同單父振鐸覺斯民兩蜀論名宦何殊漢吏循

題向撫屏先生長生會步原韻

一生心氣本和平霽月光風大有情道德德從心驗矩少文章脫手彈

長壽縣志

卷十五文徵下

三四

丸驚馨香木主留高位瀨瀚鐘鏞發大聲壇杏依然蘋藻在私家俎豆

憶陽明

彭述古

永川人

題長生會步原韻

直上崑崙路不平此中消息孰知情元精耿耿疑君在至德庸庸莫我驚香火綿延長壽品文章浩瀚大江聲三千果位伊誰定好藉秋光助爾明

周駿聲

永川康生

題長生會步原

誰將禮教續昌平我愛此翁古性情道氣養成天地闊文心吐出鬼神驚一篇範水橫山賦千載春風化雨聲自恨無緣前席拜徒臨秋月想圓明

張葆吉

和采薇上人

世界茫茫歧路多，拚將人壽俟黃河。先朝文物名心在，滄海波濤瞥眼過。萬里西歸借野鶴，八年北望慨銅駝。邦家多故原天定，遺璞堅貞任琢磨。

彭光遠 詞六闕

漁家傲 凌雲山東坡讀書台懷古

嘉陵翠撲峨眉掃，長江萬里迴環抱。多少劫灰亭不倒，尋遺藁。當年人在蓬萊島。晏嬰曾沮尼山道，東坡又忌伊川老。一聖一賢坐枯稿。休懊惱。用世何如傳世好。

謝池春 工都草堂

每飯思君難得，寒松柏浣花溪淚痕猶漬。自居稷契，奈天涯落魄，望

長壽縣志

卷十五 文徵下

三五

長安劍門雲隔，淒涼幕府嚴武。那知好客稱詩王，古今創格騷壇史。筆是春秋一脈，恨名流半多淪謫。

虞美人 薛濤井

十一節度消磨久，卿井長不朽。萬里橋邊歌舞空，尙有詩箋茗碗動。王公流離瑣屑難歸去，抔土埋香處。錯過少陵莫漫愁，須知美人名士各千秋。

點絳脣 塗山

綏尾龐狐，西蜀文章從此始。唾餘棄地，篆成巴字水。巢縣會稽紛爭，迷故址。啓穴自分明。鳥聲猶把呱呱擬。

浪淘沙 司馬長卿

題橋幾躊躇，駟馬高車。意氣凌雲獻子虛。當年不受王孫辱，終老蓬廬。病渴茂陵居，兒女秋歔。篋中惟有封禪書。空勞天子求遺藁，經濟何

如

錦堂春 楊子雲

草元空說心淡美新何事面諛旁人嘲笑憑君解難解莽大夫 奸雄
多愛文士權門易玷名儒一朝托足成千古眼孔怕模糊

吳芳吉

字碧珩江津人善新體詩於梵天史詩波斯神頌希臘古哲之敘述美洲九子之歌錄以迄芬蘭衆利諾曼攝提之風既多濡染而屈子宋玉溫李元白李杜諸詩寢饋亦深吾邑傳潤華爲之搜集刊成詩稿附錄數首以規詩體之變遷云

兩墓表辭

一黃克強墓表一蔡松坡墓表皆在長沙對岸岳麓山上民國十年三月二十日湘人制憲於兩墓表下之岳麓書院吾既觀其盛典更拜謁二墓慨念前賢爲辭頌之

兩墓表兮矗矗上將茲焉兮幽宿克強兮山巔松坡兮山曲亭亭立兮
樹梢白石美兮如玉惟斯人兮可親精神在今民族洞庭兮莽蒼衡嶽
兮葱鬱百年兮方中豪傑兮輩出覽茲墓表兮追思見我湘人兮氣骨
湘波兮浩蕩岳麓兮奔放孤城兮微茫大野兮平曠莽縈帶四周萬家
環以瞻望墓表兮指天山河兮無恙天之高兮洋洋我心極兮悲壯彼

長壽縣志

卷十五 文徵下

三六

來日兮方長惟斯人兮草創吁嗟墓表兮堂皇昭我湘人兮向上

浴普陀海岸

千步沙作

我生蜀山中見山不見海今日與海親悠然大自在一水碧汪汪了無
纖塵礙一身赤條條只有輕雲蓋仰視惟高明俯視惟澎湃不知是海
水不知是惟愛使我不能名名他慈母的海

兒在海中望兒的慈母望遠望不到望到長江孤嶼兒生十餘與母同
寢處臉枕着母的腕手捧着母的乳在母的懷渣渣似鸚鵡

只母的腕已弱母的乳已涸母的小鸚鵡兒已變做雲中孤鶴飛向海
天一角何時更還我鸚鵡兒的生活

曉露清涼母送兒上學過橫塘斜日昏黃母候兒放學倚茅牆提起兒
書囊摺起兒衣裳攜着兒到廚房給兒玉黍豆漿那豆漿的甜玉黍的
香至今滋味深良

兒的書聲是母所愛聽母的呼聲是兒所貪聞一盞青油燈一條柏木
凳夜夜到三更坐着兒母兩人母聽兒讀書兒傍母縫紉是時家在江
津兒方九齡

母知兒有天資教兒漢魏唐詩兒讀爛陶潛謝眺李白王維那及我母
詩的希奇古詩是文章母詩是慈悲古詩只快憶母詩足忘饑母可是
兒詩中之師兒與母學詩自呱呱墮地時

母的笑容是兒的詩境母的和聲是兒的詩韻母的精神是兒的詩興
母的一身是兒詩的結晶母或者半是詩人母或者半是詩神

海風響嗚嗚海水皺如梳樹成伴我似雙鳧活潑潑地笑相呼潮來一
線粗捲起沙灘舒舒我心如醉看還無隨潮顛倒真有如似笑的雙雙
手來扶

